

仕進部

愛君 憂世 官政 租賦 征商 治盜 偷盜

人事部

幕名 辭名 迎候 餞送 行旅 別離 還歸
合并 書簡 投贄 慶賀

吟又別集

知 3
74/60
735



160
35

新編古今事文類聚別集卷之二十二

楚安

祝務

和父

編

金陵

唐景

子和

梓

仕進部

愛人君

[Faint bleed-through text from the reverse side of the page, including characters like '愛人君' and '仕進部']

新編古今事文類聚別集卷之二十二

建安 祝穆 和父 編

金陵 唐富春 子和 梓

仕進部

愛君

羣書要語善則稱君過則稱已坊記忠臣雖在昧死猶不忘君


劉向傳若葵藿之傾太陽雖不為迴光然終向之者誠也曹子建

詩句馳心輦轂下曹子建揮涕戀行在道途猶恍惚杜生逢堯

舜君不忍便永訣杜獨隨朝宗水李白平生五色線願補舜衣

裳杜杜牧之微臣欲獻唐虞壽遙指南山對袞龍王維只因誅報

利
268
35



君恩重清夢時時到玉堂坡

古今事實

乃心王室

康叔雖爾在外乃心罔不在王室康誥

耻君不及堯舜

昔先正保衡曰予弗克俾厥后為堯舜其心愧耻說命

三宿出書

孟子曰我非堯舜之道不敢以陳於王前故齊人莫如我敬王也予三宿而後出書於予心猶以為速

曝背獻芹

宋國有田父常衣緼麤至春自曝於日當爾時不知有麋度隙

室縣續孤貉顧謂其妻曰負日之暄人莫知之以獻吾君將有賞也其室告之曰昔人有美戎葵甘泉葦芹萍子對鄉豪稱之鄉豪取嘗之蜚於口慘於腹衆哂之列子楊朱

瞻顧其國

屈原雖放流瞻顧楚國繫心懷王而不忘

心居魏闕

魏子牟身在江湖之上心居魏闕之下莊子

願入禁闥

汲黯補淮陽太守曰臣常有狗馬之心今病力不能任郡事願為中郎出入禁闥補過拾遺

事君之禮不同

按列子所載止如此稽叔夜與山巨源絕交書云野人有快炙背而美芹子飲之至尊後世遂有獻芹之說矣無所由特稽叔夜合而言之耳

元祐初哲宗幼冲起文潞公以平章軍國重事召程頤正叔為
 崇政說書正叔以師道自居每侍上講色甚莊繼以諷諫上畏
 之潞公對上恭甚進名唱名侍立終日上屢曰太師少休公頓
 首謝立不去時公年九十矣或為正叔曰君之倨視潞公恭議
 者以為未盡正叔曰潞公三朝大臣事幼主不得不恭吾以布
 衣為上師傅其敢不自重吾與潞公所以不同也識者服其言
 聞見錄

古今文集

詩話

丁飯不忘君見詩門

終是愛君見詞門

退不忘君

朱文公晚年家居題桃符云愛君希道泰憂國願年豐則見公
 非不欲仕但道不合則去耳

憂世

羣書要語我瞻四方厯厯靡所瞻節南山憂心如忒同上心之
 憂矣不遑假寐小弁自古聖人賢士皆非有心求於闡用世憫
 其時之不平人之不義得其道不敢獨善其身而必以兼濟天
 下也韓文處廣廈宜念巢居露寢者食兼味宜念餬口甌塵者
 夏清涼宜念曝日而耕者冬温燠宜念空歲無衣者英華庾州
 食堂記進不知富貴之為樂退不忘天下以為心歐集

詩句但傷民疾病不識時忌諱白樂天我若未忘世雖閑心亦恒世若未忘我雖退身難藏白遂我一身逸不如萬物安元稹志士白髮早孟郊中原未得平安報醉裏眉攢萬國愁荆白髮憂民雖種種丹心託國尚桓桓歐玉顏自古為身累肉食何人為國謀歐貌先年老因憂國事與心違始乞身歐挽杜祁公

古今事實

古聖憂勞

神農憔悴堯瘦臞舜衡黑禹胼胝由此觀之則聖人憂勞百姓甚矣淮南子

仲尼憂世

孔子去魯將而行之魯曰遲遲吾行也去父母國之道也萬

章仲尼皇皇學行轍環天下卒老于行韓文孔席不暇煖班固

孟子憂世

孟子周流憂世遂以儒道遊於諸侯思濟斯民趙岐序

不忘社稷

楚子囊死遺言謂子庚必城郢君子謂子囊忠將死不忘衛社稷序

漆室憂魯

魯漆室邑之女過時未適人倚柱而嘯鄰婦曰子欲嫁乎曰非也予憂者魯君老太子幼鄰婦曰此丈夫之憂也女曰不然昔有客過繫馬園中踐予葵使予終歲不飽葵鄰女奔使予兄追之逢水溺死使予終身無兄予聞河潤九里漸汝三百步今魯

國有患君臣父子被其辱婦女獨安所避乎戰國策

發婦憂周

發不恤綿而憂宗周之亡左

藿食憂國

東郭祖朝者上書於晉獻公曰願請聞國家之計公曰肉食者已慮之矣藿食而何預焉祖朝曰肉食者一旦失於廟堂之上若臣等藿食者寧得無肝膽塗地於中原之野其禍亦及臣之身安得無預國家之計乎說苑

歷詆公卿

漢息夫躬論議無所回避上疏歷詆公卿曰方今丞相王嘉徒而董縮不可用御史大夫賈延隨弱不任戢左將軍公孫祿司

隸鮑宣皆外有直項之名內實駭不曉事諸曹以下僕邀不定數如狂夫噪譟於東崖匈奴飲馬於渭水使邊境雷動四野風起京師雖武逢精兵未有能窺左足而先應者也注窺音跬半步也言一舉足也

臨終憂國

王坦之臨終與謝安桓冲書惟以國家為憂言不及私晉武紀

憂喜為國事

杜正獻公衍一日憂見于色問生曰公今日何以不悅公曰適覩朝報行某事某事非便所以憂爾又一日喜見于色曰今日見朝報某人某人進用社稷之福也公又曰孔子稱不在其位則不謀其政某荷國厚德退居以來家事百不關心獨未能忘

老猶憂國

韓魏公雖在外其心常繫社稷至自老而心益篤或有時聞更祖宗一法度壞朝廷一綱紀則終日不食言行錄

退歸默坐

王文正公且或歸私第不去冠帶入靜室中默坐家人惶恐莫敢見者而不知其意後公弟以問趙公安仁趙公曰見議事公不敢行而未決此必憂朝廷矣言行錄

先天下憂

范文正公少有大節其於富貴貧賤毀譽歡戚曾不一動其心慨然有志於天下嘗自誦曰士當先天下之憂而憂後天下之

樂而樂神道碑

憂過在位

呂獻可病卧洛陽猶旦夕憤歎以天下事為憂過於在位任其責者矣神道碑

古今文集

雜著

時化

元結

元子聞浪翁山野浪者也說化化無窮極因論諭曰翁亦未知時之化也多於此乎曰時焉可化我未之記元子曰於戲時之化也道德為嗜欲化為險薄仁義為貪暴化為凶亂禮樂為耽淫化為侈靡政教為煩急化為苛酷翁能記於此乎時之化也

夫婦為溺惑所化化為犬豕父子為昏慾所化化為禽獸兄弟
 為猜忌所化化為讎敵宗戚為財利所化化為行路朋友為世
 利所化化為市兒翁能記於此乎時之化也大臣為威權所恣
 忠信化為姦謀庶官為禁忌所拘公正化為邪佞公族為猜忌
 所限賢哲化為庸愚人民為征賦所傷州里化為禍耶姦凶為
 恩幸所迫厮皂化為將相翁能記於此乎時之化也山澤化為
 井陌或曰畫於草衣原野化為狴犴或曰殫於鳥獸江湖化為
 鼎鑊或曰暴於魚鱉祠廟化為宮寢或曰數於禮禱翁能記於
 此乎時之化也情性為風俗所化無不作狙狁詐詐之心聲呼
 為風俗所化無不作諂媚僻淫之辭顏容為風俗所化無不作
 姦邪慙促之色翁能記於此乎

世化

元結

浪翁聞元子時化歎曰吾昔聞世化可說又異於此昔世之化
 也天地化為斧鑕日月化為豺虎山澤化為州里草木化為宗
 族風雨化為邸舍雪霜化為衣裘呻吟化為常聲糞污化為梁
 肉一息化為千歲鳥犬化為君子元子惑之浪翁曰子不聞徃
 昔之化也四海之內巷戰門鬪斷骨腐肉萬里相藉天地非斧
 鑕也耶人民暗夜盜起求食晝遊則死傷相及日月非豺虎也
 耶人民相與寄身命於絕崖深谷之底始能聲呼動息山澤非
 州里也耶人民奔走非深林蒼叢不能蔽蔽草木非宗族也耶
 人民去鄉國入山海千里一息力盡暫休風雨非邸舍也耶人
 民相持於死傷之中裸露而行霜露非衣裘也耶人民勞苦相

冤瘡痍相痛老弱孤獨相苦死亡不相救呻吟非常聲也耶人
民多饑餓溝瀆病傷道路糞污非梁肉也耶人民奔亡潛伏戈
矛相拂前傷後死免而存者一息非千歲也耶疆王腐鄉相枕
路隅鳥獸讓其骨肉鳥犬非君子也耶

訊毗

劉禹錫

劉子如京師過徐之右鄙其道旁牛有毗增增扶班白犂羈角
賡生器荷農用摩肩而西僕夫告亭曰斯宋人梁人亭人穎人
之逋者今復矣予愕而訊云予聞隴西公暢載之止方踰月矣
今尔曹之來也欣欣然似恐後者其聞有勞來之薄歟獨復之
條歟振贍之恩歟碩鼠亡歟瘵狗逐歟曰皆未聞也且夫浚都
吾政之上游也自巨盜開囂而武臣顛焉牧守由將校以授皆

虎而冠子男由胥徒以出皆鶴而軒故其上也子視卒而芥視
民其下也鷲其理而蚌其賦民弗堪命是軼于他土然咸重遷
也非陷危擠墜不能逼之曩者雖歸成誣而故態相沿莫我敢
復今聞吾帥故為丞相也能清淨畫一必能以仁蘇我矣其佐
嘗守京邑也能誅鋤豪右必能以法衛我矣奉斯二必而來歸
惡待事實之及也予因浩歎曰行積於彼而化行於此實未至
而聲先馳聲之感入若是之速歟然而民知至至矣政在終終
也試嘗論聲實之先後曰民黜政煩必須理而後勸斯實先聲
後也民離政亂須感而後化斯聲先實後也立實以致聲則難
在經始由聲以循實則難在克終操其柄者能審是理俾先後
始終之不失斯誘民孔易也

古詩

春陵行 并序

元結

癸卯歲漫叟授道州刺史道州舊四萬餘戶經
 賊以來不滿四千太半不勝賦稅到官味五十
 且承諸使徵求符牒二百餘封皆曰失其限者
 罪至貶削於戲若悉應其命則州縣破亂刺史
 欲焉逃罪不應命又即獲罪戾必不免也吾將
 守官靜以安人待罪而已此州是春陵故作春
 陵行以達其情

軍國多所須切責在有司有司臨郡縣刑法競欲施供給豈不
 憂徵歛又可悲州小經亂亡遺人實困疲太鄉無十家大族命

單羸朝食是草根暮食乃木皮出言氣欲絕意速行步遲追呼
 尚不忍泥乃鞭撲之郵亭傳急符求往跡相追更無寬大恩但
 有迫促期欲令費兒女言癸恐亂隨悉使索其家而又無生資
 聽彼道路言悲傷誰復知去冬山賊來殺奪幾無遺所願見王
 官撫養以惠慈奈何重驅逐不使存活為安人天子命符節我
 所持州縣忽亂亡得罪復是誰通緩違詔令蒙責固所宜則賢
 重守分惡以禍福移亦不貴守官不愛能適時顧惟辱窮者正
 直當不戲何人采國風吾欲獻此辭

賊退示官吏 并序

元結

癸卯歲西原賊入道州殺掠幾盡而去明年賊
 又攻永州破郡不犯此州邊鄙而退豈力能制

敵歟蓋家其傷憐而已諸使何為心苦徵故作

詩一篇以示官吏

昔年逢太平山林二十年泉源在庭戶洞壑當門前井稅有常期日晏猶得眠忽然遭世變數歲視戎旃今來典斯郡山夷紛紛然城小賊不屠人貧傷可憐是時陷鄰境此州獨見全使臣將命來豈不知賊焉今彼懲歛者追之如火煎誰能絕人命以作時世賢思欲委符節引卒自刺船將家就魚交歸老江海邊

同元使君春陵行

并序

杜甫

覽道州元使君春陵行兼賊退後示官吏作二首志之曰當天子分憂之地效漢官良吏之目今盜賊未息知民疾苦得結輩十數公參詣天

下為邦家萬物吐氣天下少安可待矣不意復

見比與體制微婉頓挫之辭感而有詩增諸卷軸簡知我者不必寄元也

遭亂髮盡白轉衰病相嬰沉綿盜賊際狼狽江漢行歎時藥力薄為客羸瘵成吾人詩家秀博采世上名繁繁元道州前聖畏後生觀乎春陵作欲見聖哲情復覽賊退篇結也實國積賈誼昔疏勳匡衡常引經道州憂黎庶詞氣浩縱橫兩章對秋月一字皆華星致君唐虞際純朴憶木庭何時降墨書用爾為丹青獄訟久衰息豈惟偃甲兵悽惻念誅求薄歛近休明乃知正人意不苟飛長纓涼飈振南嶽之子寵若驚色沮金斗大興含滄浪清我多長卿病日久思朝廷肺枯渴大甚漂泊公孫城呼兒

具紙筆隱几臨軒楹作詩呻吟內墨淡字欹傾感彼危苦詞庶
幾知者聽

新安吏

杜甫

客行新安道喧呼聞點兵借問新安吏縣小更無丁府帖昨夜
下次選中男行中男絕短小何以守王城肥男有母送瘦男獨
伶俜白水暮東流青山猶哭聲莫自使眼枯汝淚縱橫眼枯
却見骨天地終無情我軍取相州日夕望其平豈意賊難料歸
軍星散營就糧近故壘練卒依舊京掘壕不到水牧馬役亦輕
况乃王師順撫養甚分明送行勿泣血僕射如父兄

石壕吏

杜甫

暮投石壕村有吏夜捉人老人踰牆走老婦出門看吏呼一何

怒婦啼一何苦聽婦前致詞二男鄴城戍一男附書至二男新
戰死者且偷生死者長已矣室中更無人惟有乳下孫孫有
母未去出入無完裙老嫗力雖衰請從吏夜歸急應河陽役猶
得備晨炊夜久語聲絕如聞泣幽咽天明登前途獨與老翁別

官政

廢事附

羣書要語學古入官書不懈于位詩委蛇委蛇退食自公羔羊
政者正也子帥以正孰敢不正語敬共朝夕恪居官次襄二十
且侵官肩也失官慢也離局姦也成十六五大不在邊五細不
在庭注言五官之長專盛過節則不可居邊細弱不勝任亦不
居朝廷昭十一釋回措枉遣次秉直事不失當舉無秕政柳御

詩句看君擁蕙組，縮卧放晚衙。坡即申縛壯士，人世信少娛。注
倉庫法早入晚出。陳簡齋鈴齋幸得親師席，東向時容問治民。
歐青衫半作霜，葉枯遇民如兒吏。坡廢職終年但如此，真
竊太官餐。曾

古今事實

争田質成

虞芮二國争田而訟，連年不決，乃相謂曰：西伯，仁人也，蓋往質
焉。入其境，則耕者讓畔，行者讓路，入其朝，則士讓為大夫，大夫
讓為卿，虞芮之君曰：嘻！吾儕小人，不可以入君子之朝，遂以其
所争為閒田。家語

甘棠聽訟

甘棠召伯聽訟也。蔽芾甘棠，勿剪勿伐，召伯所爰。

始謗終誦

孔子相魯，魯人謗曰：麇裘而韉，投之無矣；韉之麇裘，投之無垂。
及三月，政成化行，民誦曰：衮衣章甫，實獲我所，章甫衮衣，惠無
我私。孔叢子子產相鄭，一年，與人謂之曰：取我衣冠而褚之，取
我田疇而伍之，孰殺子產？吾其與之。三年，又謂之曰：我有子弟，子
產誨之；我有田疇，子產殖之；子產而死，誰其嗣之？

日昃不休

前漢薛宣守左馮翊，及日昃，休吏職曹掾張扶獨不肯休坐曹
治事。

首抑豪強

後漢周紆為洛陽令下車問大姓主名吏以閭里豪強對紆曰
本問貴戚若馬實等輩豈能知此賣菜傭乎部吏望風爭以激
勸為事京師肅然

杖吏從輕

桓公在荊州恥以威刑肅物令吏受杖止從朱衣上過桓式云
向見令吏受杖上稍雲根下拂地足意識不着公曰我猶患太
重世說

赤子龍蛇

扶風馬公摠為鄆曹漢節度觀察等使鎮其地公承死亡之後
撥拾之餘剝膚推髓公私掃地赤立新舊不相保持萬目睽睽

公於此時能安以泊之其功為大又曰公之始至衆未孰化以
武則忿而憾以恩則橫而肆一以為赤子一以為龍蛇德心罷
精磨以歲月然後致之難也及教之行衆皆戴公為親父母韓愈
愈鄆州溪堂詩序

拷罪立名

李嵩武后時為御史鞠獄備諸慘酷其訊罪人皆有名如仙人
獻果玉女登梯犢子懸車驢兒拔樹鳳凰曬翅彌猴鑽火之類
唐朱摠遺 周興為周秋官侍郎性慘毒推劾殘忍法外苦楚無
所不為拷縛罪人有仙鶴曬翅胡孫碾茶鬼拽鑽牛拔樹之名
時人呼為牛頭夜叉談賓錄

戲為判語

李自誠為長葛宰。雜職犯過，乃戲判曰：「豈有終日執之而不知其味者乎？」國史補

能辯冤獄

錢若水為同州推官。有富民家小女奴逃亡，不知所之。奴父母訟於州，命錄事參軍鞫之。錄事嘗貸錢於富民，不獲，乃劾富民父子數人，共殺女奴，棄尸水中，遂失其尸。或為元謀，或從而加罪，皆應死。富民不勝榜楚，自誣服。州官皆以為得實。若水獨疑之，留其獄數日不決。一日詣州，屏人言曰：「已密使人訪求女奴，得之矣。知州驚曰：『安在？』若水密使人送女奴於知州所。乃垂簾引女奴，父母示之，泣曰：『是也。』乃引富民父子，悉破械縱之。其人號泣不肯去。知州曰：『推官之力也。』其人趣詣若水廳事。若水閉

門拒之，不得入。繞垣而哭，傾家貲，飯僧為若水祈福。涑水

支散軍糧

王德用在定州。一日倉中給軍糧，軍士以所給米黑，喧嘩紛擾。監官懼，逃匿。有四卒以黑米見德用，德用曰：「汝從我當自入倉，乃往召專副問曰：『昨日我不汝給二分黑米，八分白米乎？』此從者執專副，又呼四卒謂曰：『黑米亦公家物，不給與汝，曹當棄之乎？汝何敢乃爾？』喧嘩如此，欲求決配乎？百拜流汗，乃捨之。倉中肅然。涑水記聞

應變倉卒

張垂崖守城，都兵火之餘，人懷反側。一日合軍旅大閱，始出眾，遂高呼者三，垂崖亦下馬東北望，而三呼復攬轡行，眾不敢譁。

趙濟畏之龍圖垂崖孫婿也嘗以此事告韓魏公魏公曰當是時某亦不敢措置忠直語錄

兩易爭業

張公詠知杭州有沈章訟兄彥均割家貲不平公撻而遣之後半載公因過其所居下馬召章并彥曰汝弟訟汝治家掌財伊幼小不知貲多少汝又分之不均乎乎彥曰均平章曰不均公曰兄之族入於弟室弟之族入於兄家即時對換人莫不服青瑣高議

判斷擲筆

韓魏公文潞公俱嘗鎮北門方魏公時朝城令決一守把兵土方二下輒停寫不已知縣以解府魏公使前問云汝罵長官信

否曰當時乘忿實有之公曰汝為禁兵既差在彼便有階級安可如此即於解狀判領赴市曹處斬從容平和略不變色眾但見其投筆方知有異至潞公時復有外鎮解一卒如前者公震怒問之兵對如實亦判處斬而擲筆以此見一公之量不同如魏公則彼自犯法吾何怒之有不惟學術之妙亦天資之過人耳元城語錄

年尊勤職

韓魏公勤于吏職簿書文檄檢察研覈莫不躬親左右或曰公位重年耆功名如此朝廷賜守卿郡以養安幸無親小事公曰已憚煩勞吏民當有受弊者且俸祿日萬錢不事事吾何安哉

辯禮冤獄

事之共勇身集 卷之二十二 十五
向相在西京有僧暮過村民家求寄止主人不許僧求寢其門
外車箱中許之夜中有盜入其家自牆上扶一婦人并囊衣而
出僧適不寐見之自念不為主人所納而強求宿而主人亡其
婦及財明白必執我詣縣矣因夜亡去不敢循故道走荒草中
忽墮井則婦人已為人所殺先在其中矣明日主人搜訪亡
僧并子婦屍得之井中執以詣縣掠治僧自誣云與子婦姦誘
與俱亡恐為人所得因殺之投井中暮夜不覺失足亦墜于井
賊在井傍亡失不知何人所取獄成言府府皆不以為疑獨敏
中以賊不獲疑之引僧詰問數四僧服罪但言其前生當負此
人死無可言者敏中固問之僧乃以實對因密使吏人訪其賊
吏食於村店店聞其自府中來不知其吏也問之曰僧某者其

獄何如吏詰之曰昨日已斃死于市矣嫗歎息曰今若獲賊則
何如吏曰府已誤決此獄雖獲賊亦不敢問也嫗曰然則言之
無傷矣婦人者乃此村少年某甲所殺也吏曰某甲安在嫗指
示其舍吏就舍掩捕捉之案問具服并得其賊一府以為神
水記聞

不屑吏事

向文簡公敏中罷相出鎮多以吏事為意寇萊公雖有重名所
至之處終日遊宴所愛伶人或付與富室厚有所得然人皆樂
之不以為非也 記聞

反墮吏姦

包孝肅尹東號明察有編戶犯法當秋春吏受賕與約曰今見

尹汝但號呼自辯我與汝分罪汝決杖我亦決杖既而包引因問果分辯不已吏訶曰但受春杖出去何用多言包謂其弄權杖之於庭特寬囚罪止從杖坐不知乃為所賣青瑣高話

時來為相

劉沆擢右正言知制誥陝西用兵沆見執政白事豈白請對極言得失仁宗送其議於中書執政不悅曰須舍人作相自行之沆曰宰相豈有常哉時來則為之

禁絕異端

程明道先生任京兆鄠簿南山僧舍有石佛歲傳其首放光男女聚觀晝夜雜處為政者畏其神莫敢禁先生始至詰其僧曰吾聞石佛歲現光有諸曰然戒曰俟復現必先白吾職事不能

往竄取其首就觀之自是不復有光行狀

肺龍折筭

明道先生為上元簿日茅山有龍池其龍如蜴蜥而五色祥符中中使取一龍至中途中使奏一龍飛空而去自昔嚴奉以為神物先生嘗捕而脯之使人不感其始至邑見人持筭道傍以黏飛鳥取其筭折之教使勿為及罷官職舟郊外有數人共語自生薄折粘筭鄉民子弟不敢負禽鳥墓誌

僕告其主

李孝壽知開封府有舉子為僕所凌忿甚亟縛之作狀欲送府會為同舍勸解久之氣亦平因釋去自取其狀戲學孝壽押字判曰不勘案決醫杖二十其僕怨之翌日即竊其狀走府曰秀

才日學知府判狀私決入老壽即令追之既至具陳所以老壽
翻然謂僕曰如此秀才所判正與我同真不用勘案命吏就讀
其狀如數決之是歲舉子會省試且數千人凡僕聞之皆畏戰
無敢肆者當時亦稱其敏 石林燕語

聞敲罰錢

鞠真卿守潤州民有聞敲者本罪之外別令先敲者出錢與後
應者小人斫財兼不憤出錢終日紛爭相視無敢下手者 青瑣
作相不親細務

或謂趙丞相欲放混補歎息云方今太倫恁地不成模樣身為
宰相合是以何為急却要急去理會這般事如何恁地不識輕
重此若果是衰亂之態只看宣和末年蕃人將至宰相談甚事只

看書錄頭一枚便見且說太學裏秀才做時文不好爾道是識
世界否且如如今待補取士有甚不得如何道恁地便取得人
才如彼便取不得人才只是亂說 朱語錄

日飲亡何 見飲酒門以下係廢職

適百乃聞

陳遵為司徒掾公府掾吏皆乘車小馬不上鮮明而遵獨極樂
馬衣服之好又日出醉歸曹事數廢西曹以故事適之侍曹白
遵曰陳卿今日以其事適遵曰適百乃相聞故事有百適者居
蒲百西曹請斥大司徒馬宮優士又重遵舉能治劇補郁夷令
眾事不理

蜀蔣琬為廣都長先生嘗奄至廣都見琬眾事不理將又沈醉

將加罪戮諸葛亮曰琬社稷之器非百里之才也為政以安民為本不以修飾為先乃不加罪但免官而已

預備錄獄

蜀何祗為督軍從事丞相聞祗遊戲放縱不勤所職嘗往錄獄祗密聞之夜張燈火見囚讀諸解狀亮晨往祗悉已聞誦對答無所疑滯亮甚異之

似是馬曹

晉王徽之為車騎桓冲騎兵參軍冲問卿署何曹答曰似是馬曹又問管幾馬曰不知馬何由知數又問馬比死多少曰未知生焉知死嘗從冲行暴雨徽之下馬持入車中謂曰公豈得獨擅一車冲嘗謂曰卿在府日久比當相料理徽之初不誦答直

高視以手版柱頰曰西山朝來致有爽氣耳

標浦廢事

陶侃鎮荊州時閭外多事于緒萬端罔有遺漏遠近書疏莫不手答筆翰如流未嘗遲滯常曰大禹聖者乃惜寸陰至於眾人當惜分陰豈可逸遊荒醉生無益於時死無聞於後是自棄也參佐或以談戲廢事者命取其酒器蒲博之具投之江中將吏則加鞭朴曰標浦者牧猪奴戲耳老莊浮華非先王法言不可行也君子當正其衣冠攝其威儀何有亂頭養望自謂宏達耶

張目不答

晉王述字懷祖性沉靜年二十未知入名或謂之癡司徒王導以問地辟為中兵屬既見無他言唯問在東米價述但張目不

答導曰王祿不癡人何言癡也嘗見導每發一言一坐贊美述正色曰人非堯舜何得每事盡善導改容謝之謂庾亮曰懷祖清負簡貴不減父祖但曠淡微不及耳

君侯信癡

晉謝萬字萬石才器俊秀簡文作相召為從事中郎萬著白綸巾鶴氅裘履屐而前與帝共談移日揚州刺史王述萬妻父也萬嘗著白綸巾乘平肩輿經述聽事前謂述曰人言君侯癡君侯信自癡述曰非無此論但晚合耳

還傳問吏

晉孟嘉字萬年庾亮領江西辟部廬陵從事嘉還郡亮問風俗得失對曰還傳當問吏亮舉麈尾掩口而笑謂弟翼曰孟嘉故

是盛德人

三宜休

唐司空圖隱中條山王官谷作亭悉圖唐興節士文人名亭曰休休作文見志曰休美也既休而美具故量才一宜休揣分一宜休耄而贖二宜休又少也墮長也率老也迂三者非濟時用則又宜休自曰為耐辱居士時盜賊所過殘暴獨不入王官谷

二宜去

唐孔戣為尚書左丞以老自乞韓愈曰公尚壯上三留何去之果戣曰吾豈要君者吾年一宜去吾為左丞不能進退即官一宜去愈曰公無留資何恃而歸曰吾負二宜去尚奚顧子言

遊山飲酒

事類彙編

卷之二十一

十一

唐潘孟陽爲戶部侍郎憲宗詔視江淮財賦所至會賈客留連
倡樂舉墜大減後鄭敬宣慰江淮帝誡曰卿是行宣諭朕意毋
若潘孟陽殫財費酣飲游山寺而已

坐鎮雅俗

姚崇嘗謂告十餘日政事委積盧懷謹不能決皇恐入謝於上
上曰朕以天下事委姚崇以卿坐鎮雅俗耳

更置閑官

唐鄭虔玄宗愛其才以不事事更爲置廣文館爲博士虔不知
廣文曹司訢宰相宰相曰上增國學廣文館以居賢者今後世
言廣文博士自君始不亦美乎

苦吟廢事

孟郊字東野家貧受溧陽尉溧陽昔爲平陵縣南五里有投金
灘瀨南八里許道東有故平陵城多櫟木合數十抱藁條蒙翳
如塢如洞地窪下積水可活魚鱉東野得之忘歸或比日或間
自乘驢頰小吏問焉投金渚坐于積水之旁苦吟到日西而去
曹務多弛廢令褊躁辯急不佳東野之爲立曰上府請以他尉
代東野分其俸以給之東野竟以窮去陸龜蒙書李賀小傳後

嗜酒廢事

王績字無功求爲六合丞以嗜酒不任事

古今文集

古詩

雜詩

劉公幹

職事煩填委。文墨紛消散。馳翰未暇食。日昃不知晏。沈沈薄願
書。回回自昏亂。釋此出西城。登高且游觀。方塘含白水。中有鳧
與鴈。安得蕭蕭羽。從爾浮波瀾。

有感

張朱

群兒鞭笞學官府。翁憐兒笞。傍笑侮。翁出坐曹。鞭復呵。賢於群
兒。能幾何。兒曹相鞭。以為戲。翁怒。鞭入血流地。笑為戲劇。誰後
先。我笑謂翁。兒更賢。

律詩

書王元之畫像側

歐陽永叔

偶然來繼前賢迹。信矣皆如昔日言。諸縣豐登少公事。一家飽
暖荷君恩。想公風采常在。顧我文章不足論。名姓已光青史
上。壁間空貌任塵昏。

事文類聚別集卷之二十三終

新編古今事文類聚別集卷之二十三

建安

祝穆

和父

編

金陵

唐富春

子和

梓

租賦

征商附

羣書要語什一。天下之正中。

通典 塙上益下。民說無疆。益卦 征

商市。而不征。法而不廛。則天下之商皆悅。而願出於其塗矣。

孟子 有賤丈夫焉。必求龍斷而登之。以左右望。而罔市利。人皆

以為賤。故從而征之。征商自此賤丈夫始矣。同上

詩句 誰知扣君門。今下寬征賦。杜 田毛樂寬征。韓

古今事實

三代取民

夏后氏五十而貢殷人七十而助周人百畝而徹其實皆什一魯之取民

魯宣公初稅畝杜預注公田之法十取其二今又履其餘畝復十收

聚斂之臣

季氏富於周公而求也為之聚斂而附益之子曰小子鳴鼓而攻之

二猶不足

及公問於有若曰年饑用不足如之何對曰盍徹乎曰二吾猶

不足如之何其徹也曰百姓足君孰與不足百姓不足君孰與足

貪如碩鼠

碩鼠刺重斂也國人刺其君重斂蠶食於民不修其政貪而畏人若大鼠也魏風

保鄣繭絲

趙尹鐸守晉陽鐸曰保鄣乎繭絲乎

秦之取民

秦始皇內興功作外攘夷狄收太平之賦發閭左之戍董仲舒曰秦用商鞅之法力役三十倍於古田租口賦增歲之計二十倍於古秦廢井田開阡陌食貨志秦頭會其斂之供軍費財匱力盡秦言陳餘傳

漢除田租

漢高祖以蜀漢民給軍事勞苦復勿租稅一歲○漢文帝詔賜民田租今年之半景帝令民半出田租三十而稅一也

唐租庸調

唐太宗凡授田者丁歲輸粟二斛稻三升謂之租丁隨鄉所出歲輸租絹一疋綾絕二丈布加五之一綿二兩麻三升非蠶鄉則輸銀十兩謂之調用人之力歲二十日閏加二日不役者日為絹三尺謂之庸有事而加役二十五日者免調三十日者租調皆免通正役不過五十日水旱霜蝗耗十四者免其租桑麻盡者免其調田耗十之六者免租調耗七者諸役皆免之

唐青苗錢

代宗皇帝詔天下田一畝稅錢十五以國用急不及秋方苗青則征之號青苗錢

上供送使留州

憲宗分天下之賦以為三一日上供二日送使三日留州

作兩稅法

德宗時楊炎作兩稅法夏輸不及六月秋輸無過十一月通典

政拙催科

陽城至道州治民如治家不以簿書介意課當上考功城自言曰撫字心勞催科政拙考下下

輸租增耗

五代漢王章為二司使往時民租石輸二升為鼠雀耗章增一

石輸二升爲二斗

荆公青苗法

荆公知明州鄞縣貸穀于民交息以償新陳相易與學校嚴保伍邑人便之熙寧所行之法皆本乎此然荆公知行於一邑則可不知行於天下不可也邵氏錄後司馬光范鎮李常孫覺程顥韓琦蘇軾爭言不使而罷矣見國史

文王不征

以下係征商

文王之治岐也關市譏而不征

成王之征

周載師凡任地國宅無征園廛二十而一近郊十一遠郊二十而三甸稍縣都皆無過十一惟漆林之征二十而五宅不毛者

有里布田不耕者出屋粟民無職事者出夫家之征

武帝重斂

武帝初筭商車又筭緡錢又令民告緡者以其半與之注有不輸稅令民得告以半與之又師旅之後用度不足乃橫與賦歛榷酒酤筭鹽鐵鑄白金造皮幣筭至車船租及六畜民力屈財用竭

唐德之征

唐陳京請稅富商錢德宗以趙贊判度支搜督甚峻諸道津會置吏閱商錢每緡稅二十竹水茶漆稅十之一以贍常平本錢屬軍用迫蹙不能備常平之積趙贊復請稅間架等除陌及涇原兵及大呼長安市中曰不奪爾戶儻質不稅爾間架阡陌矣

食貨志

宋之寬征

宋太祖詔勿得苛留行旅齎裝除貨幣當輸等外不得輒發篋搜索

不稅農器

真宗祥符間呂夷簡請免農器之稅

寧征商賈

仁宗慶曆間議欲弛茶鹽之禁及減商稅范仲淹以為茶鹽商稅之入但分商賈之利爾於商賈未甚有害也今國用未嘗歲入不可闕既不取之山澤及商賈必取之於農與其害農孰若取之商賈

置市易法

文彦博奏市易司遣官監賣果實有損國體歛民怨乞罷罷凡衣冠之家圖利於市搢紳清議尚所不交豈有大國皇皇求利而不為物議所非者乎王安石曰陛下不殖貨利豈於菓實數千緡息以規利者直以細民久困於官中須索文為兼井所苦故為立法耳

罷欄頭稅

孝宗朝或乞復置西溪欄稅上曰關市譏而不征去城五里之外豈可復欄稅

古今文集

雜著

事類彙編

卷之三十三

七

捕蛇者說

柳宗元

永州之野產異蛇黑質白章觸草木盡死以齧人無禦之者然
得而腊之以為餌可以已大風孿跛癩癘去死肌殺三虫其始
大醫以王命聚之歲賦其二募有能捕之者當其租入求之人
爭奔走焉有蔣氏者專其利三世矣問之則曰吾祖死於是吾
父死於是今吾嗣為之二十年幾死者數矣言之貌若甚感者
余悲之且曰若毒之乎余將告乎泚事者追若役復若賦則何
如蔣氏大戚汪然出涕曰吾將哀而生之乎則吾斯役之不幸
未若復吾賦不幸之甚也嚮不為斯役則父已病矣自吾氏三
世居是鄉積于今六十歲矣而鄉鄰之生日蹙殫其地之出竭
其廬之入號呼而轉徙饑渴而頓踣觸風雨犯寒暑暍噓毒癘

徃徃而死者相藉也曩與吾祖居者今其室十無一焉與吾父
居者今其室十無二三焉與吾居二十年者今其室十無四五
焉非死則徙爾而吾以捕蛇獨存悍吏之來吾鄉呼囂乎東西
墮突乎南北謹然而駭者雖雞狗不得而寧焉吾恂恂而起視
吾缶而吾蛇尚存則弛然而卧謹食之時而獻焉退而甘食其
土之所有以盡吾齒蓋一歲之犯死者二焉其餘則熙熙而樂
豈若吾鄉鄰之且且有是哉今雖死于此比吾鄉鄰之死則已
後矣又安敢毒耶余聞而愈悲孔子曰苛政猛於虎也吾嘗疑
乎是今以蔣氏觀之尤信嗚呼孰知賦歛之毒有甚於是蛇者
乎故為之說以俟夫觀人風者得焉

古詩

喜入夏月

卷之二十三

六

重賦

白居易

厚地植桑麻，所要濟生民。生民理布帛，所求活一身。身外充征賦，上以奉君親。國家定兩稅，本意在憂人。厥初防其淫，明勅內外臣。稅外加一物，皆以枉法論。奈何歲月久，貪吏得因循。浚我以求寵，斂索無冬春。織絹未成疋，練絲未盈斤。里胥迫我納，不許暫逡巡。歲暮天地閉，陰風生破村。夜深燈火盡，靈雪白紛紛。幼者形不蔽，老者體無温。悲喘與寒氣，併入鼻中辛。昨日輸殘稅，因窺管庫門。綿帛如山積，絲絮似雲屯。號為羨餘物，隨月獻至尊。奪我身上暖，買爾眼前恩。進入瓊林庫，歲久化為塵。

傷田家

聶夷中

二月賣新絲，五月糶新谷。得眼前瘡，剜却心頭肉。我願君王

心化作光明燭，不照綺羅偏照逃亡屋。

織婦怨

文與可

擲梭兩肘倦，踏籜雙足趺。三百不往織，一疋纔可剪。織處畏風日，剪時審刀尺。省言邊幅好，自愛經緯密。昨朝持入庫，何事監官怒。大字雕印文，濃和油墨汚。父母抱歸舍，拋下中門下。相看各無語，淚迸若傾瀉。質錢解衣服，買絲添上軸。不敢輒下機，連霄停火燭。當須了租賦，豈暇血襦袴。前知寒切骨，甘心扇背露。里胥踞門限，呼罵嗔納晚。安得織婦心，變作監官眼。

田家詞

元結

牛吒吒，田确确。旱塊敲，蹄跖跖。剝種得官倉珠顆穀。十年來兵燹，月月之倉糧。車轉轉，一日官軍收海服。驅牛駕

軍食羊肉歸來收得牛兩角重鑄鐵作斤斷姑春婦擔輸促促
輸官不足歸賣屋農死有兒牛有犢不遺官軍糧不足

打麥

張舜民

打麥打麥彭彭魄魄聲在山南應山北五月太陽出東北纔離
海嶠麥尚青轉到天心麥已熟鷓鴣且催入夜不眠竹鷄呼雨雲
如墨大婦腰鎌出小婦具筐逐上壠先將青下壠已成束田家
以苦乃為樂敢憚頭枯面焦黑貴人薦廟已掌新酒醴雍容會
所親曲終饜飲勞童僕豈信田家味久唇盡將精好輸公賦次
把斗升求市人麥秋正急又秧禾豐歲自少凶歲多田家辛苦
可奈何將此打麥詞兼作插禾歌

野老歌

張籍

老翁家貧在山住耕種山田三四畝苗疎稅多不得食輸入官
倉化為土歲暮餓殍倚空室呼兒登山收橡實西江賈客珠百
斛船中養天長肉食

田家行

王建

男聲欣欣女顏悅人家不愁言語別五月雖熟麥風清簷頭索
索噪車鳴野蠶作繭人不取葉間撲撲秋蛾生麥收上場綰在
軸的是輸得官家足不望入口復上身且免向城賣黃犢田家
衣食無厚薄不見縣門身即樂

當窓織

王建

歎息復歎息園中有棗行人食貧家女大富家織翁母隔牆不
得力水寒手遊絲脆斷續來續去心腸爛草虫促促機下啼兩

日催成一匹半。輸官上頭有零落。姑未得衣身不着。當認却羨青樓倡。十指不動衣盈箱。

治盜

偷盜

羣書要語：赭衣半道，群盜滿山。賈山至言斬木為兵，揭竿為旗。

賈誼過秦大攻城邑，小掠鄉里。咸宜傳殲厥渠魁，脅從罔治。

論延及于平民，不冠賊鴟，義姦穴奪，攘矯虔。呂刑偷盜慢藏，誨

盜。易係鼠竊狗偷。文集探囊發篋。劉敞疏推埋鼓鑄。秦觀文

詩句兵革身將老，關河信不通。杜涼風動，萬里群盜正縱橫。杜

託身白刃裏，殺人紅塵中。李軍旅西征急，風塵戰伐多。李天兵

宿西北，狂兒尚稽誅。歐已經百白，軍荆棘。身上無有完肌膚。杜

偷盜何况親行獄，敲榜發姦偷。韓偷兒夜探赤白丸。蘇

古今事類

萑符之盜

鄭子產有疾，謂子太叔曰：我死，子必為政。唯有德者能以寬服民，其次莫如猛。夫火烈，民望而畏之，故鮮死焉。水懦弱，民狎而玩之，則多死焉。故寬難，疾數月而卒。太叔為政，不忍猛而寬，鄭國多盜，取人於萑。音九符音蒲之澤。澤名。太叔悔之，曰：吾早從夫子，不及此。與徒兵以攻萑符之盜，盡殺之，盜少止。仲尼曰：善哉！政寬則民慢慢，則糾之以猛；猛則民殘殘，則施之以寬。寬以濟猛，猛以濟寬，政以是和中。昭二十

不獲民麥

宓子賤爲單父宰齊攻魯父老請曰麥熟請放民皆使出穫麥
宓子不聽曰若使不耕者得穫是使民樂有寇也 家語

潢池弄兵

宣帝時渤海盜賊並起丞相御史舉龔遂召見對曰海瀕遐遠
不霑聖化其民困於饑寒而吏不恤故使赤子盜弄陛下兵於
潢池中耳今欲使臣勝之耶將安之也曰選用賢良固欲安之
也遂至渤海移書屬縣悉罷捕盜賊吏有持鉏鉤田器者皆爲
良民吏無得捕盜賊悉平民安土樂業民有帶持刀劍者使賣
劍買牛賣刀買犢曰何爲帶牛佩犢

探赤白丸

漢尹賞成帝時長安少年群輩殺吏相與探丸爲彈得赤丸者
斫_レ武吏得黑丸者斫_レ文吏白者主治喪城中薄暮塵起剽劫行
者死傷橫道賞以選守長安令修治獄穿地方深數丈以大石
覆其口名爲虎穴乃部吏舉長安輕薄惡子弟得數百人分行收
捕賞親閱見十置_レ其餘盡以次內虎穴中覆以大石數日一
發視皆死瘞寺門栢東揭著其姓名百日後冷死者家發取其
尸長安爲之語曰安所求死子栢東少年塲生時諒不謹枯骨
後何葬_注栢聲如和今猶謂之華表卽和表也

綠林赤眉

王莽末民並起爲盜賊王鳳馬武王常成丹共聚藏綠林山中
至七八千人樊崇起兵一歲間三萬餘人恐其衆與莽兵亂乃
皆赤其眉以相識別後馮異擊破之

焚書安反側

後漢光武拔邯鄲誅王郎收文書得吏人與郎交關毀謗者數千章光武不省會諸將燒之曰令反側子自安

黃巾之寇

靈帝時鉅鹿張角以妖術教授徒眾數十萬皆著黃巾以為標幟故時人謂之黃巾賊帝遣盧植皇甫嵩集討賊戰大敗之

賊不入境

後漢韓韶太山賊舉偽號連年不能被韶以三府掾選為羸長賊聞其賢不入其境餘縣多被寇盜流入縣界者甚眾韶開倉賑之主者爭謂不可韶曰長活溝壑之人以此得罪含笑入地矣太守聞韶德竟無所坐

單車降賊

張綱傳廣陵賊張嬰危亂十餘年朝廷不能討大將軍梁冀然綱曾奏乞以為廣陵太守欲因事中之綱單車之職徑造嬰壘申示國恩嬰初大驚既見綱誠信皆拜泣曰荒裔愚人不堪侵枉相聚偷生若魚遊釜中喘息須臾間其實恐投兵之日不免擊戮綱約之以天地誓之以日月嬰乃降綱在郡卒年三十六綱病吏人咸為祠祀祈福言千秋萬歲何時復見此君張嬰等制服行喪

以舌擊賊

晉朱伺字仲文為江夏騎督時西陽夷賊抄掠太守陽岷每請督將議拒賊計伺獨不言岷曰朱將軍何以不言伺曰諸人以

力擊賊伺惟以舌耳

姊妹遇盜

唐奉天寶氏二女生長草野幼有志操永泰中群盜數千人剽掠其村落二女皆有容色長者年十九幼者年十六匿巖穴間曳出之驅迫以前臨壑谷深數百尺其姊先曰吾寧就死義不受辱即投崖下而死盜方驚駭其妹繼之自投折足破面流血群盜乃捨之而去

兄弟遇盜 見兄弟門

黃巢之亂

黃巢募眾數千以應王仙芝轉寇河南十五州眾遂數萬入斬黃北掠齊魯入鄆沂驅河南山南之民十餘萬掠淮南寇浙

東踰江西破虔吉饒信等州因刊山開道七十里直趨建州僞路圍福州是時閩地諸州皆沒陷桂管進寇廣州破潭州攻鄂州轉掠江西再入饒信杭州眾至二十萬攻臨安戍將董自兵寡不敢戰伏弩射殺賊將賊駭乃還殘宣歙等十五州廣明元年陷睦婺二州濟采石侵揚州悉眾渡淮犯申光穎宋徐兗等州陷東都張承範以疆弩三千防關巢攻關齊克讓戰關外俄而巢至師大呼川谷皆震巢乘黃金輿衛者繡袍華幘騎士數十萬先後之陷京師自奉明門升太極殿僭即位號大齊求衣冕不得繪弋綈為之取廣明判其文曰唐去丑口而著黃明黃擋代唐明年李克用破巢於渭南四年二月克用追巢敗之擒巢愛子巢計感謂林言曰若取吾首獻天子言不忍巢乃自刎

不殊言因斬之函首獻行在

吏貪致盜

淳化間彭山縣令齊元振者貪暴虐民王小波剖其腹實之以錢蓋苦其誅求無厭也眾推其妻弟李順為帥入成都僭號王繼恩討平之

化賊為民

張誅知益州時四郊多壘城門盡閉王繼恩嘗送三十輩請誅治之誅悉令歸農業繼恩怒誅曰前日李順脅民為賊今日誅與公化賊為民何不可哉

敗儂智高

廣西源州蠻儂智高反陷十餘州命狄青討儂智高青敗智高

於歸仁鋪詳見上元門

敗范汝為

建州民范汝為作亂詔孟廣宣撫韓世忠副之次福州福帥程遇請世忠曰宜少休以俟元夕世忠曰吾以元夕凱旋見公矣次年春破殺賊眾范汝為自縊死

盜能却兵以下係偷盜

齊興兵伐楚子發帥師以當之兵三却楚盡用其計齊師愈強於是市偷進請曰臣有薄伎子發諾而遣之偷則夜解齊將軍之縛子發使人歸之明白又取其枕子發又歸之明白又取其簪子發又歸之齊師大駭將軍曰今日不去楚軍恐取吾頭乃還師而去

雖賞不竊

季康子患盜問於孔子孔子對曰苟子之不欲雖賞之不竊語

雞鳴狗盜 見賓客門

偷長擒盜

張敞守京兆尹市偷盜多敞乃召偷盜酋長數人見之責問因
賞其罪令致諸盜以自贖偷長曰今日且詣府恐諸偷驚駭願
權補吏職敞皆以為吏遣歸休置酒小偷悉來賀各飲醉偷長
以糝汚其身衣裾吏坐里閭閱出者汚糝輒收縛之一日捕得
數百人盡行法罪由是市無盜賊

梁上君子

陳寔在鄉閭平心宰物為太丘長有盜夜入其室止於梁上寔

命子孫訓之曰不善之人未必本不慈習與性成如梁上君子
是也盜驚自投地寔徐譬之曰視君狀貌不似惡人直深克已
反善然當由貧今遺絹二疋自是一縣無復竊盜

殺賊不顧子

後漢橋玄為太尉以疾罷少子十歲獨游門次卒有三人劫之
登樓就玄求貨有頃司隸率河南尹至恐并殺其子不欲迫之
玄瞑目曰姦人無狀玄豈以子之命而縱國賊乎促令兵進
玄子亦死玄乞天下凡劫質皆并殺之不得贖以財寶京師劫
質不避豪貴於此遂絕

操刀捕賊

吳孫堅年十七與父共載至錢塘會海賊掠取賈人財物於岸

上堅操刀上岸東西指麾若分部羅遮賊狀賊見以為官兵捕之散走堅追斬一級父大驚

拊床盜頂

晉祭齋有勇氣聲若震雷嘗有一偷入室齋拊床一呼一盜俱隕故商浩委以軍鋒焉

可置青氈

王獻之常夜比齋中有偷人入其室盜物都盡獻之徐曰偷兒青氈我家舊物可特置之群盜驚走

盜笋及菜

宋會稽郭原平宅上種竹夜有盜其笋者奔走墜溝乃於溝上立小橋令通鄰里慚愧 武康沈道虔見人竊其園菜乃自隱

逃有竊園後太筭冷入止之曰此欲成林買太筭送與之盜者慚不敢取

罰偷掃街

齊王敬則為吳興守錄得一偷令偷身長掃街路久之令舉舊偷自代諸偷恐皆走境內以清

墻壞致盜

宋有富人太雨墻壞其子曰不築必將有盜暮而果大亡其財韓非說難

婦能擊盜

唐鄭義宗妻盧氏略涉書史事舅姑甚得婦道嘗夜有強盜數十持杖鼓噪踰垣而人家入悉奔竄惟有姑自在室盧肩白刃

往至姑側為賊捶擊幾死

盜沒為官戶

隋麥鐵杖驍勇有膂力日行五百里走及奔馬陳建中為群盜廣州刺史歐陽願俘之以獻沒為官戶配執御傘每罷朝後行百餘里夜至南徐州踰城而入行火光劫盜且還及時仍又執傘如此者十餘度物主識之州以狀奏帝惜其勇捷誠而釋之煬帝朝與賊戰死

執偷而榜

晏元獻公剛峻簡率盜入其第執而榜之既委頓以送官扶至門即死出言行錄

託鍾辯盜

陳述古密直知建州蒲城縣時人有失物捕得莫知的為盜者述古乃給之曰其廟有一鍾能辯盜至靈使人迎置後閣祠之引群囚立鍾前自陳不為盜者摸之則無聲為盜者摸之則有聲述古自率同職禱鍾祭甚肅祭訖以帷圍之乃陰使人以墨塗良久引囚逐一令引手入帷摸之出乃驗其手皆有墨惟有一囚無墨訊之遂承為盜蓋恐鍾有聲不敢摸也此亦古之法出於小說筆談

取劍斷盜足

柳開字仲塗幼警悟豪勇父顯德末為南縣令有盜入其室眾不敢動開年十二取劍逐之盜踰垣開揮劍斷其足一指

古今文集

古今文集

古今文集

古今文集

雜著

齊司寇對

程晏

齊境多寇司寇不理景公召司寇讓之反諍公曰請理君朝廷之寇也公曰君廢其職反責我欲辭其責也曰不然君不聞鼯鼠之牙乎食人與百類雖齒盡而不痛俗謂之其口鼠也魯國之牛聞食其角矣請以是諷焉牛之寢齒有蚊蚋撓其膚毛必知鼓耳搖尾以揮之及鼯鼠食之即不知痛也鼠之一牙豈不甚於蚊蚋乎以其口其雖貫心徹骨而不知也况其角乎公誠取臣以司寇請司朝廷之寇然後司封疆之寇也朝廷之寇其鼯鼠乎食君之角矣又將貫骨與心也是患大而君不知也封疆之寇蚊蚋乎但撓君之膚毛耳君將鼓耳搖尾而揮之

是患小而不知大也臣所以急其大而不知慢其小而得知也景公不喻竟坐司寇以不事晏子曰司寇死田氏為廳於齊矣律詩

聞慶州趙縱使君與党項戰死

杜牧

將軍獨乘鐵驄馬榆溪戰中金僕姑死緩却是古來有驕將自驚今日無青史文章爭點筆朱門歌舞笑捐軀誰知我亦輕生者不得君王空一文

皇祐中儂賊犯慶州闔郡潰去惟守臣曹觀死之妻

方產子棄之草間亂後訪之尚呱呱然

元厚之

轉戰譙門日欲捕空拳猶自把戈鉄身乘虎口方安坐命在鴻

毛更疾呼柱下臬卿存斷節袴中杵白得遺孤空餘三尺英雄
氣不愧西山大丈夫

詩話

作詩贈賊

李涉嘗過九江皖白遇盜問何人從者曰李博士也其豪首曰
若是李涉博士不用剽奪久聞詩名願題一篇足矣涉贈一絕
曰春雨蕭蕭江上村綠林豪客夜知聞他時不用相迴避世上
如今半是君

古詩以下係偷盜

次韻子瞻送顧子敦河北運使

黃魯直

儒者給事中顧公甚魁偉經明往行河乎嘗以經明禹貢使行

河商畧頗應史勞民又費之國計安能已成功渠有命得人斯
可喜似聞阻飢餘惡少驚聞里啓輪探銖金奪懷取姝美部中
十盜發一二書奏紙西連魏二河東盡齊四履此豈小事哉何
但徒治冰使民皆農桑乃是真儒耳

寄盧仝

韓愈

玉川先生洛城裏破屋數間而已矣有奴長鬚不裹頭有婢赤
脚老無齒云昨夜長鬚來下狀隔牆惡少惡難似每憑屋山
下窺瞰渾舍驚怕走折趾憑依婚媾欺官吏不信冷行能禁止
先生受屈未曾語忽此來告良有以嗟我身為赤縣令操權不
用欲何竢立召賊曹呼五百俗呼行林盡取鼠輩戶諸市先生
又遣長鬚來如此處置非所喜況又時當長養節都邑未可猛

政理先生固是余所畏，度量不敢窺。涯淡放縱是誰之過歟？效先戮僕愧前史，買羊沽酒謝不敏。偶逢明月輝，桃李先生有意許。降臨更遺長鬚致，雙鯉。

吳羽行

陳去非

吳羽無人支，緩急天雨壞。墻百憂集，賣衣雇人築。得墻不慮偷，兒披戶入夜寒于。取左裏二十五年注于，取夜行也。不經過偷兒若來知，奈何君不見巴丘古城如培塿，魯肅當年萬人守。

新編古今事文類聚別集卷之二十三

新編古今事文類聚別集卷之二十四

建安 祝穆 和父 編

金陵 唐富春 子和 刊

人事部

慕名 辭名附

羣書要語 君子萬夫之望。易係高山仰止，景行行止。車牽如圭，如璋。令聞令望。卷阿是以有譽處兮。景行先哲。孝經君子疾沒世而名不稱焉。季氏令聞廣譽施於身，所以不願人之文繡也。子孟子。今名德之興，左宣。君子務積於身，則貴名起之。如日。荀儒效。講聞高義之日久矣。漢武制策。竊高下風之行。鄒陽。

書政自也出天下想聞其風采霍光傳天下之士得一識面者退誇於人以爲榮至於游談布衣之賤往往竊門下之名歐集見面不知聞名傳燈錄辭名名公器也不可多取莊子大名之下難居越世家

詩句城中好高髻四方高一尺城中好廣肩四方且半額城中

好大袖四方全足帛東漢馬廖傳誰能齊嶺峯掛君山嶽德五

落月升屋梁猶疑見顏色杜名高海曲人所慕荆公平生執鞭

最欣慕山谷辭名漸喜交游絕幽居不用名杜何須身後千載

名李直以踈傭招物議休將文字占時名韓苦藏難沒是詩名

坎白頭寧復要時名后山

古今事實

學孔希顏

孟子曰乃所願則學孔子也孫丑楊子曰希顏之人亦顏之徒行

捧心效顰

師金曰西施病心而顰其里之醜人見而美之歸亦捧心而顰

其里之富人見之堅閉門而不出貧人見之挈妻子而去之莊

慕蘭

司馬相如慕蘭相如之爲人更名相如

季諾

曹丘生曰楚諺曰得黃金百斤不如得季布一諾足下何以得

此聲於梁楚之間哉

暴公威名

事類彙編

暴勝之為直指使素聞雋不疑賢至渤海遣吏請與相見不疑
冠進賢冠帶襪具劔珮環玦褒衣博帶盛服至門上謁勝之開
閣延請望見不疑容貌尊嚴衣冠甚偉勝之躡履起迎登堂坐
定不疑據地曰竊伏海濱聞暴小子威名舊矣今乃承顏接詞
凡為吏太剛則折太柔則廢威之以刑施之以恩然後立功揚
名永終天祿勝之敬納其戒

不見黃生見別離門

登龍門

李膺獨持風裁以聲名自高士有被其容接者名為登龍門

得御李君

李膺性簡兀無所交接南陽樊陵求為門徒荀爽嘗謁膺因為

其御既還喜曰今日得御李君矣其見慕如此

林宗巾

郭林宗遇雨巾一角墊時人乃故折一角以為林宗巾其見慕
如此

所敬數賢

陳矯李弼謂陳登曰遠近之論謂明府驕而自矜登曰夫閨門
雍穆有德有行吾敬陳元方兄弟淵源玉潔有禮有法吾敬華
子魚清修疾惡有識有義吾敬趙元達博聞強記奇材卓犖吾
敬孔文舉雄姿傑出有王霸之略吾敬劉元德餘子瑣瑣焉足
錄所敬如此何驕之有呂布傳

披霧觀天

衛瓘見樂廣而奇之曰此人之水鏡見之瑩然若披雲霧而覩青天也

欲識莫致

陶潛江州刺史王弘欲識之不能致潛常往廬山弘令潛故人寵通之齎酒於半道要之及至欣然共飲

會坐不相識

晉荀鳴鶴陸士龍二人未相識因會張華華以其並太才謂曰今日相見可勿作常語陸舉首曰雲間陸士龍荀答曰日下荀鳴鶴陸曰既開青雲覩白雉何不張爾弓挾爾矢張曰荀何遲荀曰本謂是雲龍駸駸今乃山鹿野麋獸微弩強是以發遲一坐撫掌

名譽晚衰

周顛以雅望獲海內盛名後頗以酒失庾亮曰周侯末年所謂鳳德之衰者也

掩鼻效詠

謝安本能為洛下書生詠有鼻疾故其音濁名流愛其詠而弗能及或掩鼻以效之

願出其門

韓愈上宰相書曰惴惴焉惟恐不得出大賢之門

泰山北斗

自韓愈沒其言盛行學者仰之如泰山北斗

景星鳳凰

本贊

韓愈與李渤書朝廷之事引領東望若景星鳳凰之始見爭先
觀之為快哉

紫芝眉宇

房瑄每見元德秀歎曰見紫芝眉宇使人名利之心都盡

爭令出門下

柳子厚名聲大振一時皆慕與之交諸公要入爭欲令出門下
下交口薦譽之墓誌

盧前王後

王勃與楊盈川盧照鄰駱賓王皆以文章齊名天下稱王楊盧
駱盈川嘗曰吾愧在盧前耻居王後

草木知名

德宗徙張萬福為豫州刺史曰先帝改爾名正者所以褒也朕
謂江淮草木亦知爾威名因復賜舊名

名下無虛

閻立本見張上疏舊書曰名下定無虛士國史纂要

至洛先訪

邵康節居洛士人之道洛者有不入公府而必之先生之廬墓誌

婦孺知名

司馬公光上疏論新法逆陳其利害曰後當如是行之十年餘
無一不如公言者天下傳誦以公為真宰相雖田父野老皆號
司馬公而婦人孺子知其為君實也行狀坡詩云兒童誦君實
走卒知司馬

名聞官禁

王樞密時之夫人梅鼎臣之女也景德初樞密副使梅夫人入
萬壽宮內太后問夫人誰家子對曰梅鼎臣女太后笑曰是聖
俞家乎由是始知聖俞名聞於官禁也歸田錄

解紛辭賞

魯仲連為趙卻秦軍欲封仲連仲連辭謝曰所貴於天下之士
排患難解紛亂而不取也即有取者是商賈之事連不忍為也
遂辭平原君而去

大名難居

范蠡與勾踐既滅吳以太名之下難以久居為書辭王曰主憂
臣勞主辱臣死昔君辱於會稽所以不死為此事也今既雪恥

謂從會稽之誅勾踐曰孤將與子分國而有之不然將加誅於
子蠡曰君行令臣行意乃裝其輕寶珠玉乘舟浮海終不反勾
踐表會稽山為蠡奉邑蠡浮海出齊變姓名鴟夷子皮耕于海
畔父子治產居無幾何致產數千金齊人聞其賢以為相曰居
家則致千金居官則致卿相布衣之極也又受尊名不祥乃歸
相印間行以去止于陶云云

賣藥避名

後漢韓康字伯休賣藥長安市時有女子從康買藥康字價不
移女子怒曰公是韓伯休耶乃不二價乎康歎曰我本欲避名
今小女子皆知我何用藥為逸民傳

恐名太盛

王儉幼篤學手不釋卷賓客或相稱美僧虔曰此兒不患無名將恐名太盛耳

身不可見

宋織有遠操不與世交馬岌高尚之士具威儀造焉織拒而不見岌歎曰名可聞而身不可見德可仰而形不可覩吾今而後知先生矣

名不可取

白居易云古人云名者公器不可以多取僕是向者竊時之名已多又欲竊時之富貴為造物者肯兼與之乎况詩人命幾如陳子昂杜甫各授一拾遺而已

造物忌名

陳搏隱華山幼時戲涓水下青衣媪抱置懷中乳之曰金汝更無嗜欲聰悟過人先生嘗戒門人种放曰子他日遭逢明主名動天闕名者古今美器造物者深忌之天地間無完名子名將有物敗之放晚節侈飾過度營產滿雍鎬間遂喪清節王壺清話

醉人推罵

蘇軾曰得罪以來深自閉塞扁舟草屨放浪山水間與漁樵雜處往往為醉人所推罵輒自喜漸不為人識平生親友無一字見及有書與之亦不答自幸庶幾免矣東坡回李端叔書

古今文集

雜著

與韓荆州書

李白

白聞天下談士相聚而言曰生不用萬戶侯但願一識韓荆州
 何矜人之景慕一至於此耶豈不以有周公之風躬吐握之事
 使海內豪俊奔走而歸之乎登龍門則聲譽十倍所以龍盤鳳
 逸之士皆欲收名定價於君侯願君侯不以富貴而驕之寒賤
 而忽之則三千賓中有毛遂使白得脫穎而出即其人焉今夫
 下以君侯為文章之司命人物之權衡一經題品便作佳士而
 君侯何惜階前盈尺之地不使白揚眉吐氣激昂青雲耶白謀
 猷籌畫安能盡矜至於制作積成卷軸則欲瘞穢視聽恐雕蟲
 小技不谷大人若賜觀芻蕘請給以紙墨兼人書之然後退掃
 閑軒繕寫呈上庶青萍結綠長價於薛下之門

盛名難居

房瑄贊曰唐名臣多言瑄德器有王佐材而史載行事亦少貶
 矣一舉喪師訖而復振原瑄以忠義自奮片言悟主而取宰相
 必有以過人者特違所長遂無成功然盛名之下為難居矣夫
 名盛則責望備實不副則訾咎深使瑄遭時承平從容帷幄不
 矣為名宰而倉卒濟難事敗隙生陷於浮虛比周之罪名之為
 累也戒哉

律詩

獻僕射相公

薛能

清如冰玉重如山百辟嚴趨禮絕攀強虜外聞須破膽平人長
 說盡開顏朝廷有道青春好閉館無私白日閑致却垂衣更何
 事幾多詩句詠間關

迎候

羣書要語主人肅客而入曲禮 僮僕歡迎稚子候門陶集 趨拜

送迎韓信傳

詩句疎慵寡將迎柳 過家父老喜出郭書 將迎坡 世人無往復

鄉老有邀迎坡 客至從噴不出迎杜 昔年結交曾遊處今 見焚

香夾道迎歐 道左旌旗諸將列馬前予 劍六蕃迎歐

古今事實

敢犒從者

寡君聞吾子將步師出於敝邑敢犒從者不腆敝邑為從者之
備居則具一日之積行則備一夕之衛襄二十一

避席爭席

莊子曰陽子居西遊於秦遇老子老子曰而睢睢而盱盱而誰
與居太白若辱盛德若不足陽子居蹙然變容其往也舍者將
迎其家公執席妻執巾櫛舍者避席煬者避竈言其尊形自變
故避之其反也舍者與之爭席矣去其矜夸故也

虛左自迎

魏公子信陵君置酒大會賓客坐定從車騎虛左自迎侯生侯
生直上載公子上坐不讓公子執轡愈恭侯生曰臣有客在市
屠中願枉車騎過之公子引車入市侯生下見其客朱亥故父
立語微察公子顏色愈和乃就車酒酣侯生曰今日喜飲之為公
子亦足矣贏乃夷門抱關者也公子自迎於眾人廣坐之中欲

就公字之名故父立公字市中人皆以贏為小人以公字為長者也侯生因進朱亥曰屠者朱亥賢者世莫能知故隱屠間取史記

負琴前驅

漢司馬相如武帝時亦作君長願為臣妾請更北南夷上拜相如為郎將建節往使至蜀太守以下郊迎縣令負琴失先驅蜀人以為寵

謝絕迎者

丰父偃為齊相召昆弟賓客散五百金與之曰始貧時昆弟不我內今吾相齊諸君迎我或千里吾與諸君絕矣無復入偃門

竹馬交迎

郭伋為刺史行部到西河美稷有兒童數百各騎竹馬於道次迎拜曰聞使君到故喜來迎

故友親迎

范式為荊州刺史友人南陽孔嵩家貧親老乃變姓名儻為新野阿里街卒式行部到新野而縣選嵩為道騶式見而識之呼嵩把臂謂曰非孔仲山耶對之嘆息語及平生勅縣代嵩嵩以為先備未又不肯去華嶠後漢

倒屣出迎

蔡邕見王粲而奇之時邕才學顯著貴重朝廷常車騎填門富客盈坐聞粲在門倒屣迎之後漢

逢迎

段會宗傳康居太子欲降漢遣衛司馬逢迎

迎廷

唐王諤傳面鵠入朝諤悉軍迎廷于放反迎也

望塵迎拜

石崇與潘岳詣事賈謐每候其出輒望塵拜本傳

門生出迎見門生門

迎一逢掖

皇甫規歸安定曰王符在門規素聞符名乃整鬢而起衣不及帶屣履出迎接符手而還與同坐極歡先是鴈門太守至規不禮時人為之語曰徒見二千石不如一逢掖

責不郊迎

竇參按江淮獄揚州節度使陳少游偃蹇不郊迎遣軍吏致問參厲辭譙責少游慙往謁參參不顧即去

古今文集

雜著

送鄭尚書序

韓愈

嶺之南其州七十其二十二隸嶺南節度府其四十餘分四府各置帥然獨嶺南節度為大府大府帥始至四府必使其佐問起居謝守地不得即賀以為禮歲時必遣賀問致水土物大府帥或道過其府必戎服左握刀右屬弓矢帕首袴鞬迎于郊

送幽州李端公序

韓愈

元年春今相國李公藩為東部員外郎愈嘗與偕朝道語幽州

事類彙編卷之二十四 十一

司徒公劉儵之賢曰其前年被詔告禮幽州入其地迂勞之使
里至每進益恭及郊司徒公紅帽首韉袴握刀左右維佩弓韞
服矢插房俯立迎道左其禮辭曰公天子之宰禮不可如是及
府又以其服即事某又曰公三公不可以將服承命及館又如
是卒不得辭云云今李公既朝夕左右端公歲時來盡其親端
公李益也宰相睨之子登進士第幽州劉濟辟為從事其為人
佐其德意欲司徒公功名流千萬歲請以愈言為使歸之獻

律詩

自成都召還華山寄陳希夷 張復之

世人太抵重官榮見我西歸大道迎應被華山高士笑天真喪
盡得虛名

餞送

羣書要語大馭掌馭王路以祀及祀鞍馭官祖而舍鞍飲酒於
其側曰餞重始有事於道也左傳祖道之際是作一土堆置大
羊於其上祭畢而以軍碾從上過象行者險阻之患如周禮祀
載是也又云祭畢則以胙肉食之謂之餞禮用兵時用犯軍法
當斬底人斬於路却兵過其中宋語錄百兩將之詩送朋友以
言餞行公承與長會宗書子交手兮東行送美人兮南浦九歌
春草碧色春水綠波送君南浦傷如之何江淹別賦長安東灞
橋迎來送去皆至此故呼為銷魂橋開元遺事漢朝鄉士供帳
餞於東都晉國名賢傾城祖於西郭陳子昂集

詩句傾城遠追送餞我千里道孫子荆征西詩六樂陳廣坐祖

張揚春風鮑明遠衣冠列祖道劉長卿二天開寵餞五馬爛生

光杜邊城有餘力早寄從軍詩杜題詩得秀句杜翰時相投杜

為問南溪竹抽梢合過牆杜臨分出苦語願子書之笏坡惟應

故山夢隨子到吾廬坡如何風雪裏更遲獨歸人坡南鴈正北

來早寄詩于首山谷南尋禹穴見李白道甫問訊今如何杜鳴

笛急吹催落日清歌緩送感行人韓若見孟公投轄飲莫忘衝

雪送君行坡憑君說與鬢參軍寒鬢相逢不相識坡青燈白酒

留故人莫愛一醉至曉角山谷

古今事實

祖道神

黃帝之子爨祖好遠遊而死於道故後人祭以為行神也祖祭因饗飲也共士氏曰修好遠遊祀以為神祖漢以午日祖

餞以百壺

韓侯出祖出宿于屠顯父餞之清酒百壺注祖將去而祀軼也既覲而及國必祖者尊其所往去則如始行焉祖於國外畢乃出宿韓奕

送人以言

孔子適周見老子辭去老子曰吾聞富貴者送人以財仁人者送人以言吾不能富貴切仁人之號聰明深察而近於死者好議入者也博辯廣大而危其身者好察人之惡者為人子者不可以有已為人臣者不可以有已史記

遠行以贖 見辭受門

六卿郊餞

鄭六卿餞宣子于郊 昭十六

送荆軻

荆軻將行太子及賓客知其事者二十餘人皆白衣冠以送之至易水之上既祖取道高漸離擊筑荆軻和歌以濮上聲士皆流涕 春秋後語

祖二踈 見致仕門

客歌驪駒 見燕飲門

不許出郭

陳蕃為豫章太守性峻不接賓客徵為尚書令送者不出郭

不過虎溪 見道士門

追送出界

郭奕字太業為野王令羊祜常過之奕歎曰羊叔子何必減郭太業少選復往歎曰羊叔子去人遠矣遂送祜出界數百里坐此免官 晉史

為鬼椰揄

羅友答桓溫曰日出門逢一鬼大椰揄云我祇見汝送人作郡何以不見人送汝出郡 世說

自送吏部

宋何尚之字彦德為吏部郎告休定省傾朝送別其父叔度曰此是送吏部郎耳非關何彦德也

共到前亭

王莫為漢陽太守。范舟於道侯別之。莫曰：可共到前亭宿息。以叙分隔。謝承後漢書。

送不越閫

齊沈顛不尚浮華。從叔敦仕宋。貴顯每遷。吳與賓客填茵。顛不至其門。敦就之。顛送迎不越閫。敦曰：吾今乃知貴不知賤也。

並不出門

城陽太守梁柳。皇甫謐從姑子也。之官有勸謐餞之。謐曰：柳為布衣。送迎不出門。食不過鹽菜。貧不以酒肉為禮。今作郡。送之是貴。城陽太守而賤。柳豈中古之人情。非吾心所安也。遭劾亦送。

唐楊憑為京兆尹。御史中丞李夷簡劾之。貶臨賀尉。獨所善客徐晦至。藍田尉餞。權德輿曰：君送臨賀。誠厚無乃為累乎。晦曰：方布衣時。臨賀知我。今忍遽棄邪。有如公異時為姦邪。請斥又可爾乎。夷簡聞之。表為御史。曰：君不負楊臨賀。肯負國乎。

賦詩祖道

張柬之授襄州刺史。中宗為賦詩祖道。又詔羣臣餞。定鼎門外。

百官班餞

李光顏復還。忠武宰相百官班餞。帝御通化門臨送。

羣公追餞

柳宗元送死論。登第歸序。羣公追餞於灞陵。列筵而觴。送遠之賦。圭璋交映矣。

送別遭劫

東坡出知杭州道由南京后山時為徐州教授告徐守孫覺願往見而覺不之許乃託疾詣告來南京送別同舟東下至宿而歸後為劉安世所彈

古今文集

古詩

送柳淳入關

孟郊

青山輾為塵白日無閑人自古推高車爭利西入秦王門與侯門待富不待貧空齋一束書獨濟誰相親

山中送從叔簡

孟郊

莫以手中瓊言邀世上名莫以山中迹久向人間行松栢有霜

操風泉無俗聲應憐枯朽質驚此別離情

送韓愈從軍

孟郊

志士感恩起變衣非變性親賓改舊觀僮僕生新敬坐作群書吟行為孤劔詠始知出處心不失平生正凄凄天地秋凜凜軍馬令驛堊時一飛物色極四靜王師既不戰廟畫在無競王粲有所依元瑜初應命一章諭檄明百萬心氣定今朝旗鼓前笑別丈夫盛

送石洪處士往河陽幕

見隱逸門詩話

送李礎判官歸湖南

韓愈

長沙入楚深洞庭值秋晚人隨鴻鴈少江共蒹葭遠歷歷余所經悠悠子當返孤游懷耿介旅宿憂婉婉風土稍殊音魚蝦日

異飯親交俱在此誰與同息偃

送蘇公知杭州

陳無已

平生羊荆州追送不作遠豈不更簡書放麈誠不忍一代不數人百年能幾見昔如馬口銜今作禁門鍵一雨五月凉中霄木江蒲風帆目力短江空歲年晚謂遲暮不及再見也

送河南皇甫少尹赴絳州

劉禹錫

祖帳臨周道前旌指晉城午橋群吏散亥字老人迎詩酒每同樂別離方見情從茲洛陽社吟詠欠書生

送遠人

張籍

日日望鄉國空歌白紵詞常因送人處憶得別家時失意還獨語多愁自不知客亭門外柳折盡向南枝

送人南中訪舊知

喻坦之

春盡火方遊思君便白頭地蒸川有毒天暖樹無秋水接二邑險依分五嶺愁為緣知己分南國必淹留

送楊子

岑參

斗酒渭城邊爐頭耐醉眠梨花千樹雪楊葉萬條煙惜別添壺酒臨岐贈馬鞭看君穎上去新月到家圓

送蕭李二郎中兼中丞充京西京北覆糧使

前人

霜簡映金章相輝同舍郎天威巡虎落星使出駕行樽俎成全策京城閱見糧歸來虜塵滅畫地奏明光

送人赴安西

前人

上馬帶吳鉤翩翩度隴頭小來思報國不是愛封侯萬里卿為

夢三邊月作愁早須清點虜無事莫經秋

奉送裴司徒令公自東都留守再命大原 劉禹錫

星使出關東兵符賜上公山河歸舊國管籥換離官行色旌旗
動軍聲鼓角雄愛棠餘故吏騎竹見新童漢壘三秋靜胡沙萬
里空其如天下望且夕詠清風

送令狐相公自僕射出鎮南梁 劉禹錫

夏木正陰茂戎裝出帝京沾襟辭闕淚回首別卿情雲樹褒中
路風煙漢上城前旌轉谷去後騎踏橋聲久領鷓行重無嫌虎
節輕終當持一筆再入福蒼生

陽關三疊 王維

渭城朝雨裊輕塵客舍青青柳色新勸君更盡一杯酒西出陽

關無故人

送李侍郎赴常州 賈至

雪晴雲散北風寒楚水吳山道路難今日送君須盡醉明朝相
憶路漫漫

送呂晦叔赴河陽 程伯淳

曉日都門颺旆旌晚風饒吹入三城知公再為蒼生起不是尋
常刺史行

送司馬君實 程伯淳

二龍閑卧洛波清今日都門獨篋行願得賢人均出處始知深
意在蒼生

新編古今事文類聚別集卷之二十四終

新編古今事文類聚別集卷之二十五

旅

旅

旅

旅

旅

旅

旅

旅

旅

旅

新編古今事文類聚別集卷之二十五

建安 祝穆 和父 編

金陵 唐富春 子和 梓

人事部

行旅

羣書要語旅瑣瑣細小也最處下極寄旅不得所安而為
旅即次懷其資得僮僕貞同上旅而
無所容故受之以異異者入也注旅而無所容以異則得所入
也序卦載脂載牽還車言適泉水星言夙駕皆定之方中今者關
然數日不見車馬有行色莊盜匪適百里者宿春適千里者三

新編古今事文類聚別集卷之二十五

一

月聚糧莊子跋履山川踰越險阻左成十三征夫勞于周行楚

詞僕夫悲予懷兮馬蹇局而不行楚詞日既西頽車殆馬煩洛

神賦墨足入秦李斯書已業行姜敬傳蒙霜露沐風雨淮南王

賜祿秩以辯裝龔勝傳櫛風沐雨多在道路文選行旅不齎糧

唐太宗紀繭足千里劉禹錫膏吾車兮林吾馬蕭文行李之李

字人姓之外更無別義左傳行李之往來杜不究意理注云行

李使人也今遠行結束次第謂之行李而不悟是行使耳按舊

文使字作李傳寫誤作李資暇集

詩句誰能久京洛緇塵染素衣謝元暉夜聞漢使歸獨向刀頭

泣從軍行馬是賒來貴童因情得頑姚合慈母手中線游子身

上衣孟平生未到處落日獨行時張喬長為萬里客有愧百年

身杜旋呵鞭手凍粘鬚羅鄴朝遊九城陌肥馬香車欺殺客暮

宿五侯門殘茶冷酒愁殺人李白

古今事實

迷途莫問

黃帝將見大隗乎具茨之山方明為御昌寓騶乘張若習明前

馬昆閻滑稽後車至於襄城之野七聖皆迷無所問途疏大隗

至人也莊子

異鄉見似人

子不聞夫越之流人乎去國數日見其所知而喜去國旬月見

所嘗見於國中者而喜及期年也見似人而喜矣不亦去人滋

久思入滋深乎夫逃虛空者藜藿柱乎鼯鼯之徑踉位其空聞

事類彙編卷之二十一

58

人足音蹙然而喜矣况乎有昆弟親戚警歎於其側者乎莊子

百舍重趺

士成綺見老子百舍重趺眠而不敢息莊天道

就國夜行

師尚父就國道宿行遲逆旅之人曰吾聞時難得而易失客寢處安殆非就封者也太公聞之夜衣而行至國萊侯來伐與之爭營史記

躡躡擔簠

虞卿躡躡擔簠說趙王注簠簠有柄者

思歸不忘

漢書韓王信報柴將軍曰僕之恩歸如痿人不忘起盲者不忘

視勢不可取

微行被辱

漢武帝嘗至柏谷夜投亭宿亭長不內乃宿於逆旅逆旅公謂王曰汝長大多力當勤稼穡何忽帶劍群聚夜行動衆此不欲為盜則淫耳上默然不應因注釃飲翁曰吾止有溺無釃也有項還內上使人覘之見翁方要少年十餘人皆持弓矢刀劍令主人媼出安過客媼歸請其翁曰吾觀此丈夫乃非常人也且亦有備不可看也不如因禮之其夫曰此易與耳鳴鼓會衆討此羣盜何憂不冠媼曰且安之令其眠乃可看也翁從之時上從者十餘人既聞其謀皆俱勸上夜去上曰去必致禍不如且止以安之有項媼出謂上曰諸公子不聞主人之言乎此翁好

飲酒狂悖不足計也今日具令公子安眠無他嫗因還內時天寒嫗酌酒多與其夫諸少年皆醉嫗出謝客殺雞作食平明上去是日還宮乃召逆旅夫妻見之賜嫗金十斤其夫為羽林郎自是懲戒希復微行漢武故事

隨牒遠方

康衡曰但以無階朝廷故隨牒在遠方注謂隨補選之常牒不被超擢也

萍浮南北

鄭康成萍浮南北黃巾為害復歸邦鄉

宿處輒掃

郭林宗每行宿逆旅輒窮洒掃及明去後人至見之曰此必郭

有道昨宿處也

夜宿古冢

陸雲嘗行逆宿故人家夜暗迷路莫知所從忽望見草中有火光於是趨之至一家便寄宿見一少年美風姿共談老子辭致深遠向曉辭去行十里至故人家云此數里中無人居却尋即宿處乃王昭家雲本無玄學自此談老殊進本傳

途窮而哭

阮籍率意獨駕不由徑路車跡所窮輒慟哭而返

富怯贖錢

平陵士孫奮富聞京師性儉怯嘗宿客舍雇錢直甚少主人曰君惜錢如此欲作士孫景卿耶三輔決錄

新豐逆旅

馬周留客沛為浚儀令崔賢所辱遂感激而西舍新豐逆旅主人不之顧周命酒一斗八升悠然獨酌眾異之

古今文集

雜著

子長遊贈蓋邦式序

馬子才

予友蓋邦式嘗為予言司馬子長之文章有奇偉氣切有志於斯文也子其為說以贈我予謂子長之文章不在書學者毋以書求之則終身不知其奇予有史記一部在天下名山大川壯麗奇怪之處將與子周遊而歷覽之庶幾可以知此文矣子長生平喜遊方少年自負之時足跡不肯一日休非直為景物役

也將以盡天下大觀以助吾氣然後吐而為書則其平生所嘗遊者皆在焉南浮長淮泝大江見狂瀾驚波陰風怒號逆走而橫擊故其文奔放而浩漫望雲夢洞庭之陂彭蠡之瀦混太虛呼瀟萬壑而不見介量故其文停滯而淵深見九疑之芊綿平山之崖我陽臺朝雲蒼梧暮煙態度無定靡曼綽約春粧如濃秋飾如薄故其文妍媚而蔚紆泛沅渡湘弔大夫之鬼悼妃子之恨竹上猶有班班而不知魚腹之骨尚無恙者乎故其文感憤而傷激比過大梁之墟觀楚漢之戰場想見項羽之喑鳴高帝之慢罵龍跳虎躍千兵萬馬太弓長戟俱遊而齊呼故其文雄勇猛健使人心悸而膽栗世家龍門念神禹之鬼功西使巴蜀跨劍閣之鳥道上有摩雲之崖不見斧鑿之痕故其文巖絕

峻拔而不可攀躋。講業齊魯之都。覩夫子之遺風。仰射鄒嶧。彷彿乎汶陽洙泗之上。故其文典重溫雅。有似乎正人君子之容貌。凡天地之間。萬物之變。可驚可愕。可以娛心。使人憂使人悲者。子長盡取而為文章。是以變化出沒。如萬象供四時而無窮。今於其書而觀之。豈不信矣。予謂欲學子長之為文。先學其遊可也。不知學遊以采奇。而欲操筆弄墨。紐綴腐然者。乃其常常耳。昔公孫氏善舞劍。而學書者得之。乃入於神庖。庖丁氏善操刀。而養生者得之。乃極其妙。事固有殊類而相感者。其意同故也。今天下之絕縱詭觀。何以異於昔。子果能為我遊者乎。吾欲觀子矣。醉把盃酒。可以吞江南吳越之清風。拂劍長嘯。可以吸燕趙秦隴之勁氣。然後歸而治文著書。子畏子長乎。子長畏子乎。

不然斷編敗冊朝吟而暮誦之。吾不知所得矣。
古詩

途中

白居易

早起上肩擗。一盃平日醉。晚憇下肩擗。一覺殘春醒。身不經營物。心不思量事。但恐綺與紈。只如吾氣味。

長安秋夕

戎昱

八月更漏長。愁人起。常早閉門寂。無事蒲地生。秋草昨宵西窓夢。先入荆南道。遠客歸去來。在家貧亦好。

早行

孔文仲

客與謂已且出視。見落月瘦馬入荒陂。霜花重如雪。海風吹萬里。兩耳凍幾脫。歲晏已苦寒。近北尤凜冽。况當清曉行。遡此原

野闊空飛帶繞頭指強不得結農家煙火微炙手粗可熱豈能
透我留而就苟且活仰頭視四字夜氣亦漸豁苦心待正晝
日想不缺

遠遊篇十九歲作

朱元晦

舉坐且停酒聽我歌遠遊遠遊何所至咫尺視九州九州何茫
茫環海以為疆上有孤鳳翔下有神駒驥孰能不憚遠為我遊
其方為子奉尊酒擊缺歌慨慷送子臨太路寒日為無光悲風
來遠壑執手空徊徨問子何所之行矣戒關梁世路百險艱出
門始憂傷東征憂賜谷西遊畏羊腸南轅犯瘴毒北駕風裂裳
願子馳堅車躡險摧其剉我我既不支瑣瑣誰能當朝登南樓
道莫宿臨太行睥睨即萬里超忽凌八荒無為蹙蹙者終日守

空堂

行路難

張籍

湘東行人長歎息十年離家歸未得故裘羸馬苦難行僮僕盡
飢少筋力君不見牀頭黃金盡壯士無顏色龍蟠泥中未有雲
不能生彼昇天翼

羲和謠

楊廷秀

中秋夜宿辟邪市詰朝早起曉星已上日欲出而
月未落光景萬變蓋天下奇觀也作羲和謠以紀之
羲和夢破欲啓行紫金畢逋啼一聲從天上下落人世千村萬
落雞爭鳴素娥西征未歸去歎弄銀盤浣風露一丸玉彈東飛
來打落桂林雪毛兔誰將紅錦幕半天赤光絳氣貫山川浪更

却駕丹砂轂，推上寒空輶。蒼生詩翁已行十里強，羲和早起道無雙。

律詩

河陽道中

李洞

衝風仍躡凍，提轡手頻呵。翻憶江濤裏，船中睡甚多。

途中早發

劉禹錫

中庭望啓明，促促事晨征。寒樹鳥初動，霜橋人未行。水流白煙起，日上綵霞生。隱士應高枕，無人問姓名。

南山早行

温庭筠

晨起動征鐸，客行悲故鄉。雞聲茅店月，人跡板橋霜。槲葉落山路，枳花明驛牆。因思杜陵夢，見鴈滿迴塘。

秋江晚泊

杜荀鶴

一望一蒼然，蕭騷向暮天。遠山橫落日，歸鳥度平川。家是去年別，月當今夜圓。漁翁似相伴，徹曉蒹葭邊。

早行

賈島

早起赴前程，鄰雞尚未鳴。主人燈下別，羸馬月中行。踏石新霜滑，穿林宿鳥驚。遠山鍾動後，曙色漸分明。

早行

許渾

失枕驚先起，人家半夢中。聞雞憑早晏，占斗認西東。響濕知行露，衣單覺曉風。秋陽弄光影，忽吐半林紅。

絕句

李義山

君問歸期未有期，巴山夜雨漲秋池。何當共剪西窗燭，却話巴

李義山詩集

卷之二十一

八

德壽堂

山夜雨時

渡桑乾

賈島

客舍并州三十霜。歸心日夜憶咸陽。無端更渡桑乾水。却望并州是故鄉。

醉後

劉商

春草秋風老此身。一瓢長醉任家貧。醒來還愛浮萍草。漂寄官河不屬人。

秋霖夜憶家

韓滉

垂老何時見弟兄。背燈愁泣到天明。不知短髮能多少。一滴秋霖白一莖。

尤溪道中

韓滉

水自潺湲日自斜。盡無雞犬有鳴鴉。千村萬落如寒食。不見人煙空見花。

早發

羅隱

北去南來無定居。此生生計竟何如。酷憐一覺平明睡。長被雞聲惡破除。

看花

羅鄴

花開只恐看來遲。及到愁如未看時。家在楚鄉身在蜀。一年春色負歸期。

行次

前人

終日長程復短程。一山行盡一山青。路傍君子莫相笑。天上由來有客星。

詩文類聚

卷之二十五

九

題驛舍

青衫白髮病將軍。旋糴黃粮買酒樽。但得有錢買客醉也勝騎馬傍人門。

盧秉

宿濟州西門外旅館

晁端友

寒林殘日欲棲鳥。壁裏青燈乍有無。小甫悄悄人假寐。卧聽疲馬齒殘芻。

秋雨

張復之

簾幙蕭蕭。竹院深。客懷孤寂伴燈吟。無端一夜空階雨。滴破思鄉萬里心。

次韻王稚川客舍

黃魯直

五更歸夢覺。一寸客愁無。奈多愁。每每占烏鵲。喜家人應。

賦廢廖歌

王稚川既得官都下有所盼未歸予戲作林夫人雅川妻歎乃歌二章與之

黃魯直

花上盈。人不歸。東下暮。實已垂。臘雪在。時聽馬嘶。長安城中。花片飛。從師學道。魚千里。蓋世功名。黍一炊。日自倚。南人不見。看盡林鳥。反哺兒。

春夕旅懷

崔塗

水流花謝兩無情。送盡東風過楚城。蝴蝶夢中家萬里。杜鵑枝上月三更。故園書動經年絕。華髮春惟兩鬢生。自是不歸歸便得。五湖煙景有誰爭。

倦客

鄭谷

十年五年岐路中。千里萬里西復東。疋馬愁衝晚村雪。孤舟悶
阻春江風。達士由來知道在。昔賢何必笑途窮。閑烹蘆笋炊菰
米。會向漁鄉作醉翁。

舟行即事

杜荀鶴

年少鬢髮雪欲侵。別家三百幾般心。朝隨賈客憂風色。夜逐漁
翁宿葦林。秋水鷺飛紅蓼晚。暮山猿叫白雲深。重陽酒熟茱萸
紫。却向江頭荷稗吟。

秋自旅中

杜荀鶴

浮宦浮名能幾何。致身流落向天涯。少年心壯輕為客。一病
來思在家。經雨凍蟬隨葉墮。過湖秋鴈趁雲斜。前程雖有投人
處。爭奈鄉間日漸賒。

容川旅居寄蕭郎中

周林英華

扣店茅軒向水開。東頭舍賃一徘徊。窓吟苦為秋江靜。枕夢驚
殘曉角催。隣舍見愁賒。酒與主人知。去索錢來。眼看白筆為霖
雨。肯使紅鱗便曝腮。

別離

羣書要語。遵大路兮。摯執子之手兮。詩歌。驪駒其辭云。驪駒在
門。僕夫具存。驪駒在路。僕夫驚駕。詩。悲莫悲兮。生別離。楚辭。慄
兮若遠行。登山臨水兮。送將歸。同上。問何闕。諸葛豐傳。
詩句。嬌兒不離膝。畏我却復去。杜契。關阻風期在。再成雨。別獨
孤及。索居動。經秋載笑。知曷月。同上。漸消酒色。朱顏淺。欲語離

情翠黛低 張藉

古今事實

孔子贈言

子路將行辭於孔子孔子曰贈以帛乎贈汝以言乎對曰請以言孔子曰不強不達不勞無功不忠無親不信無復不恭無禮謹此五者而已矣子路曰願終身奉之家語

老子贈言

孔子去周而老子送之曰吾聞富貴送人以金仁者送人以言吾雖不能富貴而竊仁者之號請送子以言凡當世之聰明深察而近於死者好訟者也博辯宏大而危其身者好發人之惡者也孔子曰敬奉教也家語

晏子贈言

曾子行晏子從於郊曰嬰聞之君子贈人以言庶人贈人以財請假於君子贈吾子以言晉大略

離羣索居

子貢曰吾離羣而索居亦已久矣

乃若婦人

子高遊趙平原君客有鄒文季節者與相友善及將還魯諸故人訣既畢文節送行三宿臨別文節流涕交頤子高徒握手而已分背就路其徒問先生與彼二子善彼有戀之心而先生厲聲高揖此無乃非親之謂乎高曰始吾謂此二子丈夫耳今乃知其婦人人生有四方之志豈鹿豕哉而嘗群聚乎孔叢子

贈以不拜

陳遵使匈奴過辭於王舟舟謂遵曰但遭世反覆唯我二人為天地所遺今子當之絕域無以相贈贈子以不拜遂揖而別遵甚喜東觀漢紀

不見黃生

後漢黃憲字叔度同郡陳藩周舉相謂曰時月之間不見黃生則鄙吝之萌復存乎心唐賀知章陸象先曰季貴清談風流吾一日不見則鄙吝生矣

士別三百

呂蒙曰士別三日則刮目相待吳志
觀物思人

王猛將行造慕容垂飲酒從容謂垂曰今當遠別何以贈我使我觀物思人晉海西公下

相別作惡

謝安嘗謂王羲之曰中年傷於哀樂與親朋別輒作數日惡義之曰年在桑榆自然至此常恐見輩覺損其歡樂之趣王羲之傳

夜宿誰家

宋選送弟入洛登舟挂席東下選凝佇久之語細君曰帆過南浦今夜清風明月宿水渚誰家

古今文集

雜著

別賦

江文通

事類彙編卷之三十五
十一
江文通別賦

黯然銷魂者唯別而已矣况秦吳兮絕國復燕宋兮千里或春
蒼兮始生乍秋風兮斲起是以行子腸斷百感悽惻風蕭蕭而
異響雲漫漫而奇色舟凝滯於水濱車遠逝於山側權容與而
未前馬寒鳴而不息掩金觴而誰御橫玉柱而霜軾居人愁昨
恍若有亡日下壁而沈彩月上軒而飛光見紅蘭之受露望青
楸之離霜巡層楹而空掩撫錦幙而虛涼知離夢之躑躅意別
魂之飛揚故別雖一緒事有萬族至若龍馬銀鞍朱軒繡軸悵
飲東都送客金天髮羽張兮簫鼓陳燕趙歌兮傷美人珠與玉
兮豔暮秋羅與綺兮嬌上春驚駟馬之仰秣登淵魚之赤鱗道
分手而街涕感寂寞而傷神乃有劍客慙恩少年報士韓國趙
則吳宮燕市鬱鬱乃心愛離邦去重瀝泣共訣拔血相視驅征馬

而不顧見行塵之時起方街感於一劍非買價於泉裏金石震
而色變骨肉悲而心死或乃邊郡未和負羽從軍遼水無極鴈
山參雲閣中風暖陌上草薰日出天而耀景露下地而騰文鏡
朱塵之照爛襲青氣之烟縹攀桃李兮不忍別送愛子兮露縹緲
裙至如一去絕國誰相見期視喬木兮故里訣比梁兮永辭春
右兮竟動親賞兮淚滋可班荆兮增恨惟樽酒兮叙悲值秋鴈
兮飛日當白露兮下時然復怨兮遠山曲去復去兮長河湄又
若君居淄右妾家河陽同瓊珮之晨照共金爐之夕香君結綬
兮千里惜瑤草之徒芳慙幽閨之琴瑟盼高臺之流黃春官闕
此青苔色秋帳含蕊明月光夏簟清兮晝不暮冬釭疑兮夜何
長織綿曲兮泣已盡迴文詩兮影獨傷倘有華陰上士服食還

德壽堂梓

仙術既妙而猶學道已寂而未傳守丹竈而不顧鍊金丹而左
堅駕鶴上漢騰鸞騰天襲游萬里少別千年惟世間兮重別謝
主人兮依然下有芍藥之詩佳人之歌桑中衛女上宮陳娥春
草碧色春水綠波送君南浦傷如之何至乃秋露如珠秋月如
珪明月白露光陰往來與子之別思心徘徊是以別方不定別
理千各有別必怨有怨必盈使人意奪神駭心折骨驚雖游雲
之墨妙皆巖樂之筆精金閨之諸君蘭臺之羣英賦有凌雲之
福辯有雕龍之聲詎能摹暫離之狀寫永訣之情者乎

古詩

古樂府

行行重行行與君生別離相去萬餘里各在天一涯道路阻且

長會向安所知胡馬依北風越鳥巢南枝相去日已遠衣帶日
已緩浮雲蔽白日遊子不顧反思君令人老歲月忽已晚弃捐
勿復道努力加餐飯

明月何皎皎照我羅牀帷憂愁不能寐攬衣起徘徊行客雖云
樂不如早旋歸

涉江採芙蓉蘭澤多芳草將之與遺誰所思在遠道還顧望舊
鄉長路漫漫浩浩同心而離居憂傷已終老

庭中有奇樹綠葉有華滋攀條折其榮將以遺所思馨香盈懷
袖路遠莫致之此物何足貴但感別經時

贈蘇武別

李陵

良時不再至離別在須臾屏營衢路側執手野踟躕仰視浮雲

事類彙編卷之二十五 十五 忠孝堂梓

馳奄忽交相踰風波一失路各在天一隅長當從此別且復去
斯須欲因晨風發送子以賤軀

同前

李陵

攜手上河梁遊子暮何之徘徊溪路側恨恨不能離行人難久
留各言長相思安知非日月弦望自有時努力崇明德皓首以
爲期

別李陵

蘇武

雙鳧俱北飛一鳧獨南翔子當留斯館我當歸故鄉一別如秦
胡會見何詎失愴恨切中懷不覺淚沾裳願子長努力言笑莫
相忘

同前

蘇武

征夫懷往路起視夜何其參辰皆已沒去從此辭行役在戰
相見未有期握手一長歎淚爲生別滋努力愛春華莫忘
時生當復歸來死當長相思

別離

陸龜蒙

丈夫非無淚不洒離別間仗劍對樽酒恥爲游子顏蝮蛇一螫
手壯士疾解腕所思在功名離別何足歎

古別離

趙徵明

爲別未幾日一日如三秋猶疑望可見日日上高樓唯見分
處白蘋蒲芳州寸心能死別不忍生離愁

贈崔純亮別

孟郊

食齋腸亦苦強歌聲無歡出朝即有礙誰謂天地寬有礙非遐

唐文選卷之五

卷之五

卷之五

卷之五

方長安大道旁，小人智慮險，平地生太行。鏡破不改光，蘭死不改香。始知君子交，久之長益彰。君心與我懷，離別俱迴惶。譬如浸蘗泉，流苦日已長。忍泣日易衰，恸悲形自傷。項籍豈非壯，賈生豈非自當。其失意時，涕泗各滿裳。古人勸加飧，此食難自強。一飽九祝噎，一嗟十斷腸。况是兒女冤，冤氣凌彼蒼。彼蒼若有知，白日下清霜。今朝始驚呼，碧落空茫茫。

怨別

孟郊

一別一回老，志士髮白早。在官易為客，居貧難自好。沈憂損性靈，服藥亦枯槁。秋風客子衣，落日行遠道。君問去何之，賤身寧自保。

汴梁留別韓愈

孟郊

不飲濁水瀾，空滯此汴河。坐見遶岸水，盡為還海波。四時不在家，散服斷線多。遠客獨顛顛，春莫各婆娑。荒陂饒曲流，野桑無直柯。但為君子心，歎息終匪他。

長安留別觀韓愈因獻張徐州

孟郊

富別愁在顏，貧別痛銷骨。懶磨舊銅鏡，畏見新白髮。古樹春無花，子規啼有血。離弦不堪聽，一聽三四裂。世途非一險，俗慮有千結。有客步大方，驅車獨迷轍。故人韓與李，逸翰雙皎潔。哀我摧折歸，贈詞縱橫設。徐方國東樞，元戎天下傑。禰生我刺遊，王粲吟詩謁。高情無遺照，朗抱開曉月。有士不理冤，有誰皆為雪。願為直草木，未向君地列。願為古琴瑟，未向君聽發。欲識交天心，曾將寶刀說。

生別難

白居易

食糜不易食，梅難菓能苦。昔梅能酸，未如生別之為難。苦在心兮酸在肝，晨雞載鳴，殘月沒征馬，重嘶行人出，迴看骨肉哭一聲。梅酸菓苦，其如蜜黃河水白，黃雲秋行人河邊，相對愁天寒。野曠何處宿，棠梨葉戰風颼颼。生別離憂從中來，無斷絕憂積心勞血氣衰，末年三十生白髮。

別三子

陳無已

夫婦死同穴，父子貧賤離。天下寧有此，昔聞今見之。母前三子後孰視，不得追嗟爾。胡不仁使我至於斯，有女初束髮，已知生離悲。枕我不肯起，畏我從此辭。大兒學語言，拜揖未勝衣。喚我欲去，此語那可思。小兒襁褓間，抱負有母慈。汝哭猶在耳，我

懷人得知

有所思

盧同

當時我醉美人家，美人顏色嬌如花。今日美人棄我去，青樓珠箔天之涯。娟娟嫦娥月，三五二八盈。又缺翠眉蟬鬢生，別離一望不見心斷絕。心斷絕，幾千里。夢中醉卧巫山雲，覺來淚滴湘江。水兩岸花水深，美人不見秋人心。含愁更奏綠綺琴，調高絃絕無知音。美人兮，美人不知為暮雨，為朝雲。相思一夜梅花發，忽到窓前疑是君。

醉留東野

韓愈

昔年因讀李白杜甫詩，長恨一人不相從。吾與東野生並世，如

何復躡一子，蹤東野不得管。白首跨龍鍾，韓子稍姦黠。自斬青

高倚長松低頭拜東野願得終始媿望東野不迴頭有如寸蓬
撞鉅鍾吾願身為雲東野變為龍四方上下逐東野雖有別離無相逢
律詩

不見

不見李生久佯狂真可哀世人皆欲殺吾意獨憐才敏捷詩千
首飄零酒一盃匡山讀書處頭白好歸來

杜甫

夜與故人別

于武陵

白日去難駐故人非舊矣空霄一別後何處更相逢過楚水千
里到秦山萬重話來天未曉月落蒲城鍾

寄南遊弟兄

竇鞏

書來未報幾時還知在三湖五嶺間獨立衡門秋水闊寒鴉飛

去日衡山

淮上與友別

鄭谷

楊子江頭楊柳春楊花愁殺渡江人數聲鳳笛離亭晚君向瀟
湘我向秦

陽關三疊

見餞送門

絕句

孫冕或云唐鄭賢

亭亭畫舸繫寒潭直到行人酒半酣不管煙波與風雨載將離
恨過江南

元相公賓府有薛書記飲酒醉後因筆令撰注字擊
傷相公猶子遂出幕醒來乃作十離詩上獻或云蜀
奴薛濤為連帥所怒作此以獻

馴擾采門四五年。毛香足淨。主人憐無端。咬着親情客。不得紅
絲毯上眠。

右大離主

越管宣毫始稱情。紅箋紙上撒花瓊。都緣用久鋒頭盡。不得裁
之手裏擊。

右筆離手

雪耳紅毛淺碧蹄。追風曾到日東西。為驚玉貌郎君墜。不得華
軒更一與。

右馬離廐

隴西獨自一孤身。飛去飛來上錦茵。都緣出去無方便。不得籠
中再喚入。

右鸚鵡離籠

出入朱門未忍拋。主人嘗愛語咬。銜泥穢汚珊瑚簾。不得梁
間更壘巢。

右燕離巢

皎潔圓明內外通。清光似照水晶宮。都緣一點瑕相穢。不得終
宵在掌中。

右珠離掌

戲躍蓮池四五秋。常推朱尾弄輪鈎。無端擺斷芙蓉朵。不得清
波更一遊。

右魚離池

瓜利如鋒眼似鈴。平原捉兔稱高情。無端竄向青雲外。不得君
事文頌聚刊集

王手上擎

右鷹離王

蒼鬱新栽四五行常將貞節負秋霜為緣春筍鑽瑤破不得垂陰覆玉堂

右竹離亭

鑄滿黃金鏡始開初生三五月徘徊為遭無限塵蒙蔽不得華堂上玉臺

右鏡離臺

詩話

詠曹顏遠詩

殷浩甥韓伯隨至彼所經歲還都浩送至渚側詠曹顏遠詩云

富貴他人合貧賤親戚離因而泣下

醉中分袂

蕭鳳使玉門關弟肅勸酒頻頻謂兄曰醉中庶分袂不悲杜送王判官黔陽信使應稀少莫在頻頻勸酒盃

奪胎換骨

東坡長短句云無情汴水自東流只載一船離恨向西州張文潛詩云亭亭畫軒繫春潭只待行人酒半酣不管煙波與風雨載將離恨過江南王平甫愛而誦之不知其出於外此奪胎換骨法也泊宅經

還歸

詳見思鄉門

羣書要語薄言還歸采藥言還言歸黃鳥式造其歸民還鄉
者心務見家不可以一步至也劉子已出反舍叔孫通傳出有
賜曰戲路及有勞曰輒脚楊國忠傳
詩句椒萊反柴荆新歸且慰意生理焉足說杜北征錦城雖
云樂不如早還家李白近家心轉切不敢問來人獨孤還樂莫
樂於還故鄉坡踏看家鄉馬脚輕王建

古今事實

來歸自鎬

薄伐玁狁至於太原文武吉甫萬邦為憲吉甫燕喜既多受祉
來歸自鎬我行永久

衮衣公歸

東山周公東征也九畿周大夫刺朝廷之不知也是以有衮衣
兮無以我公歸兮

馬生角

燕太子丹為質於秦秦不禮乃求歸秦曰待烏頭白馬生角當
放子歸太子仰天哭感得烏頭白馬生角秦王大驚乃遣丹歸
遊歷記聞

杖節歸漢見羊門

彭澤賦歸見米門

角巾還第

有往來者言庾公有東下意或謂王公可潛稍嚴以備不虞王
公曰我與元規雖俱王臣本懷布衣之好若其欲來吾角巾徑

還烏衣何所稍嚴

角巾歸里

羊祜與從弟琇曰既定邊事當角巾東路歸故里為容棺之壤以白土而居重位何能不以成蒲受責乎本傳

千載來歸

遼東城門華表柱忽有一白鶴少年欲射之乃飛徘徊言曰有烏有烏丁令威去家千載今來歸城郭是人民非何不學仙塚

置軟脚局

郭子儀自同州歸詔大臣就宅作軟脚局人率三百千 大唐

古今文集

雜著

歸去來辭

陶潛

歸去來兮田園將蕪胡不歸既自以心為形役奚惆悵而獨悲悟既往之不諫知來者之可追實迷途其未遠覺今是而昨非舟搖櫂以輕颺風飄飄而吹衣問征夫以前路恨晨光之熹微乃瞻衡宇載欣載奔僮僕歡迎稚子候門三徑就荒松菊猶存攜幼入室有酒盈樽引壺觴以自酌盼庭柯以怡顏倚南窓以寄傲審容膝之易安園日涉以成趣門雖設而常閑策扶老以流憩時矯首而遊觀雲無心以出岫鳥倦飛而知還景翳翳以將入撫孤松而盤桓歸去來兮請息交以絕遊世與我而相遺復駕言兮焉求悅親

威之情話樂琴書以消憂農人告余以春及將有事乎西歸或
命車或棹孤舟既窈窕以尋壑亦崎嶇而經丘木欣欣以向
榮泉涓涓而始流善萬物之得時感吾生之行休已矣乎富形
宇內復幾時曷不委心任去留胡為乎皇皇欲何之富貴非
吾願帝鄉不可期懷良辰以孤往或植杖而耘耔登東臯以舒
嘯臨清流而賦詩聊乘化以歸盡樂夫天命復奚疑

古詩

休假還舊業便使

王維

謝病始告歸依依入桑梓家人相佇立相候衡門裏時輩今長
年成人舊尊子上堂嘉慶畢顧與姻親齒論舊忽餘悲自存且
相喜田園轉蕪沒但有寒泉水衰柳且蕭條秋光清邑里入門

乍如客歸騎非便止中飲顧王程離憂從此始

示三子

陳無已

去遠即相忘歸近不可忍兒女已在眼眉自略不省喜極不得
語淚盡方一哂了知不是夢忽忽心未穩

還里

陳無已

曠土愛吾廬遊子悲故鄉慨慷四方志老衰但悲傷虛名自成
誤失得略相當莫年還家樂未覺道路長閭里喜我來車馬塞
康莊爭前借言色草木亦精光向來千人聚一老獨徜徉手開
南陽阡松柏鬱蒼蒼承願守丘脫身萬里航平生功名冷倒
海澗我腸尚恐北山南有文移路傍

律詩

喜文類及訓

秋晚歸故居

李昌符

馬首曾行處連嘶渡晚河
忽驚柳樹出漸識路人多
細徑穿禾黍頽園壓薛羅
乍歸猶似客鄰叟亦相過

送孟大歸襄陽

杜門不欲出久與世情疎
以此為長策勸君歸舊廬
醉歌田舍酒笑讀古人書
好是一生事無勞獻子虛

還卿偶書

黃拱

離別家卿歲月多歸來人事半
消磨惟有門前鑑湖水春風不
減舊時波少小離家老大回
卿音難改髮毛衰兒童相見不相
識借問客從何處來

歸計

沈存中

住山人少說山多
空只年年憶薜蘿
不是自心應不信
眼前歸計又蹉跎

歸洛言懷

司馬君實

三十餘年西復東
勞生薄宦等飛蓬
所存舊業唯清白
不負明時有朴忠
早避喧煩真得策
未逢危辱好收功
太平觸處農桑滿
羸取閒聞鶴髮翁

人口并

羣書要語勿疑朋益替
注勿疑則朋合疾也
豫卦避道相遇
有蔓草脫然若沉痾
之去體灑然若執執之濯
清風也
韓文

詩句江湖十年別
衰老一樽同
劉長卿
桃李春風一盃酒
江湖

夜雨十年燈

山谷

江山千里俱頭白

山谷

古今事實

傾蓋而語

孔子之刻遇程子於塗傾蓋而語終日甚相親

家語

班荆而食

楚伍舉將奔晉聲子遇之於鄭郊班荆相與食而言

左襄二十六

刮目相待

魯蕭過呂蒙言議常欲受屈拊蒙背曰吾謂太弟但有武略今者學識英博非復吳下阿蒙蒙曰士別三日即更刮目相待

相別一世

張乖崖少與逸人傅霖同學公既顯達霖三十年不可得見憶霖詩云寄語巢由莫相笑此身終不羨輕肥晚年守死丘有被禍騎驢叩門大呼曰語尚書青州傅霖關吏走白公曰傅先生天下士汝何人敢呼姓名霖笑曰別子一世尚爾童心是豈知世間有我哉公問昔何隱今何出霖曰子將亡矣來報子公曰詠亦自知之霖曰知復何言後一月公薨

古今文集

雜著

聚星亭畫屏贊并序

朱元晦

按世說陳太丘詣荀朗陵貧儉無僕役乃使元方將車季方持杖從後長丈尚少載着車中既至荀

使叔慈應門慈明行酒餘六龍下食文若亦小坐
 着膝前于時太史奏真人東行若亭陳氏故有離
 榭名以聚皇蓋取續陽秋語中更廢壞近始作新
 適邇敞廬因得相其役事既又為之本原事迹書
 着屏上并為之贊以視來者云

倚歟陳子神嶽鍾英文淵懿範道廣心平危孫汚隆卷舒自我
 是日庶幾無不可獻身安衆用孺全邦炯然方寸秋月寒潭
 願言懷人曰我同志故朗陵君荀季和氏連峯對起麗澤潛滋
 儻而不見有黯其思薄言造之顧無僕役獨呼二兒駕予以出
 青芻黃犢布幘柴車策紀前衛杖藜後趨所造伊何高陽之里
 維時荀君聞至而喜顧謂汝靖往應子門七龍矯矯布席開尊

靖肅而前翁拜其辱何悟斯晨得見清穆命奕行觴旅饋次陳
 獻酬交錯禮度情親載笑載言固非德義益邁乃猷以輔斯世
 髡髦兩稚亦置膝前源深本固莫出匪賢維此慈明特謝儻匹
 晚際國屯敢渾濡迹贅旒之命恃以少延邦朋之最孰與為先
 郁乃附曹群亦亡漢嗣守之難古今共歎崇臺回極于以占天
 猶曰茲野德星萃焉我寓有亭舊蒙斯號今刺前聞象儀以告
 高山景行好德所同課忠責孝獨槩余衷百爾窺臨鏡考毋怠
 死國承家永奉明戒

古詩

贈衛八處士

杜甫

人生不相見動如參與商今夕復何夕共此燈燭光少壯能幾

時鬢髮各已蒼訪舊半為鬼驚呼執中賜焉知二十載重上君
子堂昔別君未婚兒女忽成行怡然敬父執問我來何方問答
未及已兒女羅酒漿夜雨剪春韭新炊聞黃梁主稱會向難一
舉累十觴干觴亦不醉感子故意長明日隔山岳世事兩茫茫

贈史修文

沈千運

故人阻千里會尚非別期握手於此地當歡返成悲念離宛猶
昨俄已經於暮疇昔皆少年別來髮如絲不過舊姓名相逢知
是誰曩遊盡驚翁與君仍布衣豈曰無其才命理應有特別路
漸欲少不覺生涕洟

元稹為御史奉使東川於褒城贈黃明府詩其序云
昔年曾於解縣飲酒余為觥錄事嘗於寶明府廳有

一人至類犯語今連飛十數觥不勝因逃去醒後問
之前虞卿黃丞也此後絕不復知元和四年三月奉
使東川十六日至褒城驛逡巡有黃明府見迎瞻其
形容髮鬢似識問其前街即曩日逃席黃丞也說向
前事黃生惘然而悟因饋酒一罇臧舟請余同載余
不欲孤其意與之盡歡徧問褒陽山水則褒姒所奔
褒城在其左諸葛所征之路次其右感余懷古作贈

黃明府詩曰

昔年曾痛飲黃令困飛觥席上當時走馬前今日迎依稀迷姓
字積漸識平生故友身皆遠他鄉眼暫明便邀連榻坐兼共刺
船行酒思涼風亂霜稜拂地平不看深淺酌貪嗆古今情迤邐

七盤路拔拖敷大城花疑褒女笑機息武侯征一種埋幽右空
聞千載名

[Faded bleed-through text from the reverse side of the page]

新編古今事文類聚別集卷之二十六

建安 祝穆 和父 編

金陵 唐富春 子和 梓

人事部

書目簡

書目簡 說文 簡書編也 釋名 簡謂之畢 爾雅 牘書版也 說文 札櫛也 編之如櫛齒相比也 釋名 斷木為槩 論衡 槩版長三尺 即牘牒也 釋名 子寧不嗣音 詩 子衿 毋金玉爾音 而有遐心 白駒 小夫之知 不離苞苴 竿牘 散精神 平蹇淺 莊子 千里之情通 管子 詠心聲 書心畫也 聲畫形 君子小人見矣 楊子 面

目之辭相適持中心之所欲通諸人之嚙嚙憤憤也者莫如言

彌綸天下之事記久明遠著古昔之昏昏目所不見傳千里之

恣恣心所不回者莫如書揚子時有奏記朱博傳移書顯責之

薛宣傳心開目明反覆數周曠然發矇蔡邕傳執玩反覆不能

釋手劉廙傳萬里之畫存於尺書劉琨傳闕然必不報幸勿為

過馬遷傳公府奏記郡將奏牋文心雕龍蔡邕曰相見無斯唯

是書疏可以當面本傳書疏往返未定解其勞結魏文帝答吳

質書信到奉所惠賜發函伸紙是何文采之巨麗而慰喻之綢

繆乎吳質答曹植書因江潭而往記于欽弔楚之湘纍揚雄反

騷承問震惶精爽飛越劉越石書申誅反覆曠若復面文選讀

之喜笑把玩無厭同上東望於邑裁書叙心文選尺牘書疏千

里面目顏氏家訓坐馳之際輪驛復來段成式書抽黃對白喻

弄飛走駢四麗六錦心繡口柳宗元乞巧文黃鵠一去青冥無

極安得不憑曹隆懇飛廉以寄心於寥廓耶柳宗元山人序言

之微妙書不能文也心之精微口不能言也張敞封事陳遵占

辭旨意各俱彌衡代書親疎得宜文心雕龍蒼鷹賴鯉而流尺

素清風朗月俱寄相思周弘讓答王褒書欲致一書問足下并

自屈其所懷含意連思將發復已卒不能成就其說建之答侯

謝建愧無雜佩贈良訊代兼金陸機誰謂情可盡盡書非尺牘

有第皆羈旅無家問生死寄書多不達况及未休兵杜泰中相

思千萬里一書直千金李烽火連三月家書值萬金杜拆書八

九讀淚落千萬行元稹忽因西飛禽贈我以瓊瑤韋應物行數
雖不多字字有委曲同上去憑游客寄來為問家書杜甫書來
細作行杜甫欲問平生無使來杜甫征人去日殷勤囑歸雁來
時早寄書樂府不狂故人書無由泛江水韓親朋無一字杜甫寄
書惟在頻無怪簡與繒韓袖中有短書願寄雙飛雁江淹厚祿
故人書斷絕北書不至屬無情杜紫鴈西飛與寄書願祝此信
的應中路見亂山何處拆書看杜牧之道州手札適復至紙長
要字二箇讀杜開緘死見諫議面盧仝謝孟諫議茶毋書付至
妻寄衣開緘發封淚痕稀

古今事實

書藏記室

成王有病周公自揃其爪以沉於河曰云乃書而藏之記
室蒙恬傳

寓書

子產寓書於子西以告晉子左襄二十四

書付其子

趙簡子少子名無恤簡子自為書牘使誦之居二年簡子坐青
臺之上問書所在無恤出其書於左袂令誦焉韓詩外傳

刀筆吏

蕭何曹參起秦刀筆吏因刀所以削書古者用簡牘故吏皆以
刀筆隨本贊

奉咫尺書

廣武君謂韓信曰君若使一介奉咫尺之書史記

萬石君為中消受書謁本傳

嫚書之辱

漢匈奴冒頓高后時遺書曰孤償之君生於沮澤之中長於平野牛馬之域數至邊境願遊中國陛下獨立孤償獨居兩主不樂無以自娛願以所有易其所無高后報書曰單于不棄敝邑賜之以書敝邑恐悞退曰自圖年老氣衰齒髮墮落行步失度單于過聽不足以自污敝邑無罪宜在見赦

鴈足繫書

蘇武留匈奴十九年昭帝立匈奴和親求武等詔言武死後漢使至常惠夜見教三吳天子射上林中得鴈足有繫著書言武等

在某澤中使者如惠語讓單于單于驚謝曰武等實在武等始以強壯出及還鬚髮盡白

買粟求益

後漢嚴光傳注侯霸使西曹侯子道奉報書報光曰我手不能書乃口授之使者嫌少可更足之光曰買粟子求益乎

藏去為榮

陳遵性善書與人尺牘主皆藏去以為榮請求不敢逆所到衣冠懷之本傳

憑几口占

陳遵為河南太守嘗遣從吏西召善書吏於前治私書謝京師親故憑几口占書數百封親疎各有意

問訊

趙廣漢為京兆尹嘗記乃湖都亭長西至界上界上亭長戲曰為我多問趙君亭長至廣漢謂曰界上亭長寄聲謝我何以不為致問亭長叩頭服實有乏因多問趙君者言殷勤若今火于萬問訊也

手跡

後漢馬融與竇伯向書曰子陵奴來賜書見手跡歡喜

青泥封

鄧訓故吏知訓好青泥封書從黎陽步推鹿車載青泥至下谷遺訓東漢記

妻不寄書

後漢王良東海人為司空司直妻子不入官舍希被瓦器司徒史鮑恢到東海過候良家妻布裙曳柴從田中歸恢曰我司徒人也故來受書妻曰妾是也苦椽無書恢歎息去

折簡可呼

王凌面縛水次遣謂司馬宣王曰卿直以折簡召我我何敢不至而乃引君來乎宣王曰以卿非折簡可呼故也魏畧

通權貴書

漢陳咸滯於郡守時王音輔政信用陳湯咸數賂遺湯予書曰即蒙子公湯字力得入帝城死不恨本傳

拜跪讀父書

吳顧愷以孝悌廉正聞於鄉黨每得父書洒掃整衣服設几案

每書其上拜跪讀之每句應諾畢復再拜

口授

蜀王平為鎮北太將軍生長戎旅手不能書所識不過十字而口授作書皆有意理使人讀史備知大義

不作草書

席豫與子弟為吏書不作草字

三國劉廙曰尊卑有分不敢修草書

黃耳傳書

見狗門

自沉自浮

殷羨為豫章太守都下人士因其致書百餘函行次石頭皆投之水中曰沉者自沉浮者自浮殷洪喬不為置書郵

浩傳

賢十部從事

劉弘每有興發手書守相下寧款密所以人皆感悅爭赴之咸

曰得劉公一紙書賢於十部從事

晉懷紀

竟達空函

桓溫將以殷浩為尚書令遺書告之浩欣然詐與答書慮有謬誤開閉者十數竟達空函大忤溫意由是遂絕殷浩致書於簡文具自申叙

帳下兒讀

劉荆州嘗自作書欲與孫伯符以示禰正平正平嗤之曰如是之作欲使孫即帳下兒讀之耶魏使張子布見乎

典畧

輕重得躰

禰衡為江夏太守黃祖作書記輕重疎密各得躰宜祖持其手

事文類聚

卷之二十六

五

日處士皆正得祖意如祖腹中之欲言也

不喜作書

嵇康作絕交書曰不喜作書而人間多事堆案盈几不相酬答則犯教傷義欲自勉則不能久

小紙勿報

何曾好學博聞武帝拜為太尉性奢侈人以小紙為書勅記室勿報

莫不手答

陶侃為荊州遠近書疏莫不手答

音詞流暢

徐湛之善於尺牘音嗣流暢

善效人書

魏鍾會與鄧艾平蜀艾先入城都會善效人書艾章表自事皆易其言令悖傲矜伐又毀文王報書手作以疑之

用小却字

晉人帖中往往用小却字其意猶言少退也南史宋武帝紀帝疾召太子戒之曰謝海數從征伐頗識機變若有同異必此人也小却可以會稽汀州處之

答書不廢應對

南史劉穆之與朱齡石於齊武帝坐並答書自且至日中穆之得百函齡石得八十函而穆之應對不廢

隨機報答

南史劉穆之

後周中書監盧柔太祖引為行臺郎對掌機密時汝頰之間多舉義來附書翰往返日餘百牒柔隨機報答皆合事宜

五雲體

唐常陟常以五朶牋為書記使侍妾主之其牋答受意而已皆有楷法陟唯署名自謂所書陟字若五朶雲時人慕之號郁公五雲體

始為疊幅

盧光啟受知於租庸張濟每致書凡事別為一紙朝士效之蓋重疊別紙自光啟

號柳篋子

柳黎迂左拾遺公卿朝野託為箋奏譽以其博洽自為柳篋子

千里對面

房元齡傳高祖曰若人機識實宜委任每為吾兒陳事千里外猶對面語

書唯稱郡

李積當以爵位不如族望官至刺史與人書唯稱隴西李積李筆國史補

壻不輒開

劉宴任權潘炎乃其壻雖書疏報答未嘗輒開時稱有古人節繫書鵠足

張九齡家養群鵠每與親知書繫鵠足上飛往投之自為飛奴王仁裕開元遺事

焚書不辨

錢徽為禮部段文昌李紳以書託徽徽不從二人怒奏徽取士以私坐貶江州或勸出文昌紳私書有直徽曰苟無愧於心安事辨證勅子弟焚書

求書先容

顧雲大順中同羊昭業等修史時劉子長僕射有清名求高途休諫議書為先容雲潛啟閱之凡一幅並不言雲但云昭業等擬將一尺二寸汗脚踏他龍尾道雲歎息而已據言

無名書

王鐸節度淮南嘗得無名書納韞中俄取他書焚之異日因小罪并以所告窮驗示眾以為神明

半夜傳緘

杜牧之作李賀集序云太和五年十月中半夜時舍外有疾呼傳緘者某曰必有異函取火來及發之果集賢學士院沈八書一道曰吾亡友李賀且死以其文求序

家書抵萬金

王筠久在沙場一日偶得家書曰抵得萬金耳

懶不附書

李翹答獨孤舍人書所不數附書者性頗慵懶便一切書斷祇作報書

漢上題衿

段成式與溫庭筠等唱和往來書目之為漢上題衿大抵多闡

關中情昵之事

投之苦海

鄭光業有_二巨皮箱_一凡投_レ誓有_レ可_レ唾者即投_レ其中號曰苦海

無書被薦

司馬光薦劉安世充館職謂安世曰光居間足下問訊不絕光居政府足下獨無書此光之所以相薦也

商人通書

丁皇州多智數在海外有一販夫輒與數百緡任其貨易歲久不問商人疑其意且欲報之曰相公或使之雖死不避丁乃預計南泉春宴必有中使在坐因作表丐還封爲書投府坐約商人曰汝必於是日到仍須宴次投之商人欣躍而去至則如其

言府坐得書懼不敢發欲置之又中使已見遂因中使回附奏自是得移光州其表云雖遷陵之罪大念山王之功多

發其私書

王荆公薦呂惠卿爲參知政事惠卿既得位遂叛荆公出荆公平日私書有曰無使齊年知齊年謂馮公京蓋荆公與馮公皆辛酉生又曰無使_レ上知_レ神宗始不悅荆公矣聞見錄

安書不讀

侍講胡安定公瑗布衣時與孫明復石守道同讀書泰山攻苦食淡終夜不寢一坐十年不歸得家問見上有平安二字即投無日不觀

張文潛每見親友書無月日便擲於地更不復觀

事文類聚別集

卷之二十六

十一

避人家諱

本朝榮陽呂公希哲嘗言凡與交遊書聞其父祖知名於世者須避其名諱凡作書須先思及書之於几然後作書身入路公與故舊款接下坐未嘗犯其父祖名諱雜志

焚書息禍

方諫議諱言為侍御史時丁謂貶遣諱言籍其家得士大夫書多干請關通者悉焚之不以聞世稱其長者厚德錄

古今文集

雜著

古帖多弔喪

閣下諸帖十卷淳化中朝廷所集其中多弔喪問疾人多疑之

比見刊誤乃唐國子祭酒李注所撰短啟出於晉宋兵革之間時國禁書疏非弔喪問疾不得輒行尺牘故王羲之直云死罪違制令故也且啟事論兵皆短而緘責易於隱藏雜志

古禮猶簡

昔人最重契舊朋從年長則以兄事之齒少或以弟或以友呼焉父之交遊敬之為丈見之必拜執子姪之禮甚恭或人行者命與其諸郎遊子又有孫者崇輩行畧不紊亂如公守之嚴禮例書禮只云啟或稱尊則云再拜雖行高而位卑者不過曰頓首再拜而已非父兄不施覆字宰輔以上方曰台候餘不啟也前輩名公尺牘中可考今俱不然誠可太息

書簡循習

近代士人相承於書尺語言浸涉奇猥雖有賢識不能自改如
小簡問委自言所在必求新異之名守贛時屬縣與國宰論
書云激水有驅策乞疏下激水者彼邑一水耳郡中未嘗知此
不足以爲工當言下邑屬邑足矣爲縣丞者無不采藍田壁記
語云負水其處哦松無補沾筆承乏皆厭爛陳言至稱丞曰藍
田殊爲可笑初赴州郡與人書必曰前政頽廢倉庫匱乏未知
所以善後必言一律正使真如所陳讀者亦不之信予到當塗
日謝執政書云郡雖小而事簡庫錢倉粟自可支吾得坐笑道
院誠爲至幸周益公答云從前得外郡太守書未嘗不以窘况
爲詞獨創見來緘如此蓋覺其與他異也此兩者皆粗熟成俗
故紀述以戒子弟輩 容齊隨筆一

書簡題自

作文字紀月日當以實言若拘拘然必以節序則爲牽強乃似
麻沙書坊桃源居士輩所設耳至於往還書問不可不繫日而
性率者一切不書事有擇生字遣報云今日已時得一子更不
知爲何時或又失之好奇外姻孫鼎臣每致書必題其後曰某
節至云小暑前一日驚蟄前兩日之類又惠公常笑云看孫鼎
臣書須看置曆日於案上蓋自元正人日上巳端午七夕重九
除夕外雖寒食冬至亦當謹識之况於小小氣候後生宜戒 容
齋隨筆

畏人索報書

士大夫得交朋書問有懶傲不肯即答者記白樂天老慵一絕

句曰豈是交親向我疎老慵自愛閉門居近來漸喜知聞斷絕
惱嵇康索報書蔡嵇康與山濤絕交書云素不使書又不喜作
書而人間多事堆案盈几不相訓答則犯教傷義欲自勉強則
不能久樂天所云正此也乃知畏於答書其來久矣容齋隨筆

古詩

飲馬長城窟行

青青河畔草綿綿思遠道遠道不可思夙昔夢見之夢見在我
傍忽覺在他鄉他鄉各異縣展轉不相見枯桑知天風海水知
天寒入阿各目媚誰肯相為言安從遠方來遺我雙鯉魚呼童
烹鯉魚中有尺素書長跪讀素書書中竟何如上有加餐食下
有長相憶

古樂府

孟父寒氣至北風何慘慄愁多知夜長仰觀衆星列三五明月
滿四五蟾兔缺客從遠方來遺我一書札上言長相思下言久
離別置書懷袖中三歲字不滅一心抱區區懼君口不識察

訓崔十五見招

李白

爾有烏折書相招琴溪飲手把尺素書如天落雲錦讀罷向空
笑疑君在我前長吟字不滅懷袖且三年

以詩代書答元舟丘

李白

青鳥海上來今朝發何處口噙雲錦書與我忽飛去鳥去凌紫
煙書留綺窓前開緘方一笑乃是故人傳故人深相最憶我
心曲離居在咸陽三見秦草綠留書雙袂間引領不斷問長望

杳難見浮雲橫遠山

寄皇甫湜

韓愈

敲門驚書睡問報睦州吏手把一封書上有皇甫字拆書放床頭涕與淚垂泗昏昏還就枕惘惘夢相值悲哉無奇術安得生兩翅

暮秋枉裴道州手札率爾遣興

杜甫

久客多枉友朋書素書一月凡一束虛名但蒙寒暄問泛愛不救溝壑辱滋落未是無心人舌存恥作窮途哭道州手札適復至紙長要自三過讀盈把那須滄海珠入懷本倚崑山玉

答邊信

長孫佐輔

征人去年戍遼水夜得邊書字盈紙揮刀就燭裁紅綺結作回

心谷千里君寄邊書書莫絕妾答同心心自結同心再解心不離書字頻看字愁滅結成一夜和淚封貯書只在懷袖中莫知書字固難久願學同心長可同

律詩

寄高詹事

杜甫

安穩高詹事兵戈久索居時來知宦達歲晚莫猜踈天上多鴻鴈河間足鯉魚相看過半月不寄一行書

夜中得循州趙司馬侍郎書因寄迴使

盧綸

瘴海寄雙魚中宵達我居兩行燈下淚一紙嶺南書地說炎蒸極人稱老病餘殷勤報賈傅莫共酒杯疎

送楊祭侍兼寄山谷

陳無已

多問黃居士終年欠一書因久問消息有使報何如

寄張大夫

陳無已

別今何向三年訊不通不應書子倦未有北來鴻

逢入京使

岑參

故園東望路漫漫雙袖龍鍾淚不乾馬上相逢無紙筆憑君傳

語報平安

投簡梓州幕府兼問常郎官

見同僚門

送蕭二十二赴歙州婚期

盧仝

淮上客情殊冷落蠻方春日客何如相思莫道無來使回鴈

前好寄書

寄元明

黃魯直

但知家裏人無恙不用書來細作行一百八盤携手上至公猶

夢繞羊腸

寄叔父夷中

黃魯直

關寒塞雪欲寄音堪薦拂天河鯉沉百書不如一見面幾日歸

來兩慰心

詩話

求書得詩

蔣堂侍郎告老姑蘇有僧將遊錢塘求呂濟叔書公作詩乃云

告老於君推掩戶年來無事老江干吾師莫訝無書去閑搜編

題不必看

青鎖高議

十年無書

章子厚與劉子先嘗有場屋之舊又頗相善子厚居京口子先
 守姑蘇以新醞洞庭春寄之子厚答詩曰洞霄宮裏一閑人東
 府西樞舊老臣多謝姑蘇賢太守殷勤分送洞庭春其後契闊
 十年子厚拜相亦不通問寄書言其相忘遠引之意子先以詩
 謝曰故人天上有書來責我疎愚喚不迴兩處共瞻千里月十
 年不寄一枝梅塵泥自與雲霄隔驚馬難追德驥才莫謂無心
 向門下也曾終夕望三台公得詩大喜即召為宰屬遂拜戶部
 侍郎

投執贄 暗投

群書要語凡贄天子幽諸侯圭卿羔大夫鴈士雉庶人

音鷲童子承襲而退野外軍中無贄以纓拾矢可也婦人之贄

棋榛脯脩棗栗 曲禮士相見之禮贄冬用雉夏用豚 禮記暗投

明月之珠夜光之璧以闇投人於道無不按劍相眦何則無故

而至前也又曰彼非所明而投之 注是猶對牛奏簧耳又曰水

聲不入於俚耳 注非委巷之所尚也又曰折楊黃華則嗑然而

笑 注俗人得嘖曲則同聲動笑也 莊齊物篇雖濂發於巧心終

見啗於拙目 史通

山谷此路無知己明珠莫暗投 高適白雲非衆定夜光忌暗投

古今事實

執贄還贄

蘇文頌

周公謂伯禽之傅曰我文王之為子武王之為弟成王之為叔父吾於天下不賤矣然而吾所執贄而見者十人還贄而見者三十人貌執之士百有餘人欲言而請畢事者千有餘人於是吾僅得三士焉以正吾身以定天下荀堯問

以鼠為璞

昔鄭人以乾鼠為璞鬻之於周宋愚夫亦寶焉石緹襲十重出聞子夫觀之者掩口胡盧而笑尹文子曰鄭人謂玉珎者為璞周人謂鼠未腊者為璞周人遇鄭賈人曰欲買璞乎鄭賈曰欲之出璞示之乃鼠也因謝不取晏類要

好琴鼓瑟

齊王好竽者求仕於齊者操瑟而往立王之門二年不得入者

曰吾瑟鼓之而能使鬼神上下吾鼓瑟合軒轅氏之律呂名焉之曰王好竽而子鼓瑟瑟雖工如王不好何是所謂工於瑟不工於求齊也韓文

以玉為石見玉門

問柏板名

韓愈皇甫湜一代龍門牛僧孺携所業謁之其首篇說樂即捲卷問曰且以柏板為在麻僧孺曰樂句二天公大稱賞由此名振撫言

古今文集

雜著

上在德翁序十五歲作

唐子西

薛郡任公之教授通義也。士之曳長裾服方領抱書束帶優游於泮宮者數百人。英俊豪傑往往輩出。有少年書生曰唐某者。誦書果甚多。屬文不甚工。碌碌落落無可稱者。一日持一軸書。捍三十寸舌草衣麻屨。携袂登門。危言高論。不顧忌諱。公一見而嗟異之。再見而禮貌之。三見而冷極之。勸戒勤篤。教論款定。某處之而不能自安。進而諮之於客。曰：公於我厚矣。吾將圖報矣。吾欲發有諛笑巧言令色以順適其意。以是報公可乎？客曰：不可。是少人之報也。吾將抱長劍挾匕首。有惡聲至者以血濺其襟。以是報公可乎？客曰：是俠客之報也。吾將淬文鋒礪詞鋒。庶義起騰奮。躍高飛遠。舉於天下。使天下之人指之曰：斯人也。出於任公之門。以是報之可乎？客曰：唯唯。是國士之報也。夫因書

以為序

琉璃瓶歌贈是

張文潛

火維荒茫地軸傾。下有積水潛鯢鯨。鼉身翻瀾山為崩。金烏下啄。獐龍騰狂鬚。奇鬚萬族朋。巨神日月雙手擎。夸城愁思烏戩。翎老魚戩死。風雨腥。長筵下掃千里驚。淡洲一席塊為城。蠻兒更女奇弁纓。大船舵天日百程。怒帆吼風戰飛鵬。世中之人恠眉睛。歎肌為舌髻。翹億萬金明珠。絡如繩。白衣夜明非縞。縞以有易無。百貨傾室中。閃爍光出楹。非石非玉色。細青昆吾寶。鐵雕春冰表。裏洞徹中。虛明宛然而深。是為瓶。補陀真人一鉢衣。紫藤葉坐花雨飛。梵羅寶手親挈携。楊枝取露救渴飢。海師傳請願有瓶。番禺寶市無光輝。流傳人間入吾手。包以百萬吳綿

厚擇人而初矜子，技燦然光輝。子文章清明無垢，君肺腸比君之德，君勿忘與君同升白玉堂。

九江千歲龜歌贈無咎

張文潛

靈龜千年口不食，以背負牀飲其息。吾家兩龜豈徒不食亦不，真壽與萬古無終極。濟南是君博物天地通，夜窺斗牛頗似晉司空。指我兩龜有名字，太龜為九江小龜號。千歲老龍洞庭怒，蕩覆荒九州禹咄嗟。水平流九江無波拍天浮，中有大靈背如丘。南風吹楚澤，蓮葉青欲采。有物中作巢，一寸玄介。霞衣仙人鬢如霜，飲以南極之光芒。丹巖老客，作瘦客，不相見飛渡東海巢。作朝扶桑，邈來蟠桃枝有子，犬如正浮遊輕於鳥。作我身輕若蓬，江海一回首青珊瑚柱碧瑤宮。水仙吹吹作

風朝戲蓮葉，西暮遊蓮花。東秋風蓮子熟，匆去清江國。小千歲太九江，我久不見之。向君案前雙我謂，是君一物育似我與子。國有守龜吾子，是燦然天下之寶器。黃金之騰紫瑤匱，天玉端冕史再拜。一逆一從定大事，我身百無用。頗似千歲潛深淵，不極人間貯金籍。三萬富貴但直奇，身江上一葉之秋蓮。萬物十不才用舍不在天，舒聲問是君然不然。

贈二蘇公

陳無已

岷峨之山中，巴江桂椒拂。樞楓柞樟，青金黃玉丹砂良。獸皮鳥羽不足管，異人間出駭四方。嚴王陳李司馬楊，一翁二季對相望。奇寶橫道驥服相，誰其識者有歐陽。大科異等固其常，小却盛之白玉堂。典謨雅頌用所長，度越周漢登虞唐。于載之下

有素王平陳鄭毛視荒荒後生不作諸老亡文体變化未可量
萬古一律如吃堯妖狐幻人犬陸梁虎豹却走逢羊羔上帝惠
願拔不祥天門夜下龍虎章前驅吳回後炎皇絳旗舟載朱冠
裳從以甲冑萬鬼行乘風縱燎無留藏天高地下日月光授公
以柄扶病傷士如稻田待公秧臨流不度公為航如太醫王治
膏背外證已解中尚強探囊一試黃菘湯一洗十年新學腸若
生塞口不敢嘗向來狂殺今尚狂請公別試囊中方

古風二首上蘇子瞻

一首見梅門

一首見松門

律詩

上知府寇相公

魏野

文武稟全才何人更可陪有官居鼎鼐無地起樓臺雪王詩左
和親王狀始回鎮臨求一陝調燮輟二公鳳閣須重去龍旌暫
擁來下車二度用上事數聲雷未暇言珪璧先蒙訪草萊幾思
移相府恐懼復徘徊

謁張安國

楊廷秀

帝苑花濃記並遊萬人回首看鰲頭也知旬月應顛面已通雲
霄又作州別後聞公非故我學林着脚到前修登門猶說同年
舊本覺紅鴛映白鷗

詩話

投梅花賦

劉禹錫上權舍人書曰昔宋廣平之沉下僚也蘇公味道時為
綉衣直指使者廣平投以梅花賦蘇盛稱之自是乃列於文人
之首

投贄不開

樂天不為贄皇公所喜每寄詩李絳之一篋未嘗開

先慢後敬

樂天未冠以文謁顧况况覩姓名熟視曰長安米貴居大不易
乃披卷讀其芳草詩野火燒不盡春風吹又生歎曰吾謂斯文
遂絕今復得子矣前言戲之耳

塗贄贄文

牛僧儒赴舉之秋嘗投贄於劉補闕禹錫對客展卷飛筆塗竄

其文歷二十餘歲劉轉汝州牛出鎮漢南在道汝州駐旌信宿
酒酣賦詩劉方悟徃年改公文卷僧孺詩曰粉署為郎四十春
今來名輩更無入休論世上昇沉事且聞樽前見在身珠玉會
應成咳唾山川猶覺靈精神莫嫌恃酒輕言語曾把文章謁後
塵禹錫和云昔年曾奉漢朝臣晚歲空餘老病身初見相如成
賦日後為丞相掃門人追思徃事嗟久幸喜清光笑語頻猶
有當時舊冠劍待公三日拂埃塵牛公吟和詩前意稱解曰二
日之事何敢當焉宰相三朝後王印可以昇降百司也於是移
宣竟夕方整前驅也劉乃戒其子咸又承雍曰吾成人之志豈
料為非汝輩進修守中為上古今詩話

梅詩見知

王沂公曾為布衣時以所業贖官文穆蒙正中有早梅詩其中句云雪中未論和羹事且向百花頭上開文穆云此生次第已安排狀元了做宰相矣已而果然湘山野錄

慶賀

辭書要語本復成而燕雀相賀淮南子慶者在堂弔者在門福

與福鄰莫知其門荀子其非惟我賀將天下實賀胎八

詩句間里自相賀韓還鄉問井邑上堂多慶喜歐歸來見親戚

握手相弔慶歐飢貧相乘除未見可弔賀坡

古今事實

慶弔相隨

蘇秦說齊王再拜仰而賀俯而弔齊王曰是何慶弔之相隨也

賀錢萬貫

單父人呂公善沛公避仇從之因家焉沛中豪吏聞令有重客皆往賀蕭何為主吏主進令諸大夫曰進不滿千錢坐之堂下

高祖為亭長素易諸吏給曰賀錢萬貫不持一錢請入呂公大驚起迎之門

不賀而弔

高祖使使拜蕭何為相國封為相國衛諸君比自賀故秦東陵侯名平獨弔謂何曰以淮陰新反有疑君心夫置衛衛君非以罷君願議封勿受悉以家財佐軍何從其計上悅

殺敵不受賀

後漢劉表為荊州牧時驃騎將軍張濟自關中奔南陽因攻襄
城中飛矢而卒官屬皆賀表曰濟以窮來主人無禮至於交鋒
此非牧意牧受弔不受賀也使入納其衆衆聞之喜遂皆服從

諸君何賀

荀勗自中書監遷尚書令甚愜有賀者勗怒曰奪我鳳凰池諸
君何賀耶

賀錢一千

呂僧珍生子宋季雅往賀暑暄曰錢一千闍人少之不為通強
之乃進梁書

遷官不受賀

唐岑文本初拜中書令有憂色母問之答曰非勲非舊責重位

高所以憂也有來賀者輒曰今日受弔不受賀

門無賀客

向敏中文簡除右僕射麻下日李昌武為翰林學士當對

真宗謂曰朕自即位以來未嘗除僕射今日以命敏中門下賀

客必多卿往觀之明日却對來勿言朕意也昌武侯丞相歸乃

往見丞相方謝客門闌悄然無一人昌武與向親徑入賀之公

但唯唯卒無一言既退復使人至庖厨中問今日有無宴會亦

寂無一人明日具以所見對上笑曰向敏中大耐官職筆談

官尊止賀

王文正公晚年官重每家人出賀立令止之因語其弟曰遭遇
如此愈增憂慎何可賀也公每有賜予見家人置於庭下乃瞑

自而歎曰生民膏血安用許多各臣遺事

古今文集

雜著

誠子孫

董生有云弔者在門賀者在閭言有憂則恐懼故事故事則必有善功而福至也又曰賀者在門弔者在閭言受福則驕奢驕奢則禍至故弔隨而來齊頃公之始藉霸者之餘威輕侮諸侯虜政蹇之容故被安革之禍隨服而已所謂賀者在門弔者在閭也兵敗師破人皆弔之恐懼自新百姓愛之諸侯皆歸其所奪邑所謂弔者在門賀者在閭

對賀者

柳宗元

柳子以罪貶永州有自京師來者既見曰余聞子坐爭斥逐余適將唁子今余視子之貌浩浩然也能是達矣余無以唁敢更以為賀柳子曰子誠以貌乎則可也然吾豈若是而無志者耶姑以戚戚為無益乎道故若是而已矣吾之罪大會王上以寬理人用和天下故吾得在此凡吾之貶斥幸矣而又戚戚焉何哉夫為天子尚書即謀畫無所陳而群比以為名蒙恥遇優以待不測之誅苟人爾有不汗栗危厲德德然者或吾嘗靜處以思獨行以求自以上不得自列於聖朝下無以奉宗祀近丘墓徒欲苟生幸存庶幾似續之不廢是以儻蕩其心倡佯其形在乎若升高以望瀆乎若乘海而無所往故其容貌如是子誠以浩浩而賀我其孰承之乎嘻笑之怒甚乎裂眦長歌之哀過乎

慟哭庸詎知吾之浩浩非戚戚之尤者乎子休矣

賀下不賀上

賀下不賀上此天下通語士人歷官一任得外無官謗中無所
愧於心釋肩而去如大執遠行雖未到家得清涼館舍一解衣
漱濯已足樂矣况於致仕而歸脫冠佩訪林泉願平生一無可
恨者其樂豈可勝言哉余出入文忠公門最久知其欲釋位歸
田可謂切矣他人或苟以藉口公發於至情如飢者之念食也
顧勢有未可者耳觀與仲儀書論可退之節二至欲以得罪而
去君子之欲退其難如此可以為好進者之戒

志林

新編古今事文類聚別集卷之二十六

